

MESYUARAT KEDUA, PENGGAL KEEMPAT  
PARLIMEN KEEMPAT BELAS  
2021

**HARI KHAMIS : 28 OKTOBER 2021**

## **KANDUNGAN**

**JAWAPAN-JAWAPAN BAGI PERTANYAAN-PERTANYAAN JAWAB**

**LISAN YANG TIDAK DIJAWAB DI DALAM DEWAN**

**( SOALAN NO. 7, 11 HINGGA NO. 44 )**

**[SOALAN NO 7 DIJAWAB BERSEKALI DENGAN  
SOALAN NO 13]**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HAJI WAN HASSAN BIN MOHD RAMLI  
[ DUNGUN ]**

**TARIKH : 28 OKTOBER 2021 (KHAMIS)**

**SOALAN**

Minta **PERDANA MENTERI** menyatakan perancangan Kementerian dalam memastikan perlindungan daripada serangan siber dari dalam dan luar serta tidak akan menggugat keselamatan infrastruktur digital negara kita pada waktu ini.

**JAWAPAN**

**DIJAWAB OLEH YB DATUK DR. ABD LATIFF AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

**Tuan Yang di-Pertua,**

1. Saya mohon untuk menjawab soalan ini bersekali dengan **soalan No.13 daripada YB Lenggong dalam aturan urusan mesyuarat pada hari dan No.36 daripada YB Muar pada 16 November 2021** ini kerana membawa maksud yang sama.

2. Kita sama-sama sedia maklum bahawa isu keselamatan siber merupakan isu keselamatan negara. Selain itu, keselamatan siber juga merupakan aspek yang penting bagi mewujudkan keyakinan (*trust*) kepada persekitaran ekonomi yang berlandaskan Internet dan digital. Kita

sedia maklum isu jenayah siber yang juga merupakan isu keselamatan siber telah mengakibatkan kerugian ratusan juta ringgit setiap tahun.

3. Kerajaan telah melaksanakan pelbagai inisiatif dalam memastikan perlindungan daripada memastikan perlindungan negara daripada serangan siber dari dalam dan luar serta terutamanya melindungi keselamatan infrastruktur digital negara kita melalui Pelan Pengurusan Krisis Siber Negara (*National Cyber Crisis Management Plan – NCCMP*) yang telah dibangunkan pada tahun 2008 lagi.

4. Pelan ini dibangunkan berdasarkan kepada rangka kerja pengurusan risiko menggariskan strategi bagi mengurangkan kesan serangan siber dan tindakbalas yang perlu dilaksanakan oleh agensi Infrastruktur Maklumat Kritikal Negara (*Critical National Information Infrastructure – CNII*), dengan izin selepas ini saya akan menyebut CNII, yang terdiri daripada agensi awam dan swasta. Pelan ini seterusnya diterjemahkan kepada Arahan Majlis Keselamatan Negara No. 24 : Dasar dan Mekanisme Pengurusan Krisis Negara dan Prosedur Tindakbalas Komunikasi dan Penyelarasan Krisis Siber Negara.

5. Kerajaan juga telah mewujudkan Pusat penyelarasan dan Kawalan Siber Negara dengan izin (*National Cyber Coordination and Command Centre - NC4*), selepas ini saya akan menyebut NC4, yang telah beroperasi pada tahun 2016 bagi memantau dan menangani sebarang insiden dan ancaman siber dari dalam dan luar melibatkan agensi/organisasi CNII yang merangkumi sektor awam dan swasta.

6. Bagi memperkukuhkan lagi tahap keselamatan siber negara bagi mewujudkan persekitaran siber yang berdaya tahan dan lestari, Kerajaan melalui Agensi Keselamatan Siber Negara dengan izin (*National Cyber Security Agency (NACSA)*) di bawah Majlis Keselamatan Negara (MKN) telah melancarkan Strategi Keselamatan Siber Malaysia dengan izin (*Malaysia Cyber Security Strategy*) selepas ini saya akan menyebut MCSS (MCSS) 2020-2024, pada 12 Oktober 2020 yang menggariskan tindakan strategik bagi menangani ancaman tersebut melalui pendekatan bersepadu meliputi pelbagai aspek keselamatan siber secara holistik dan terselaras. Strategi ini menekankan lima (5) tonggak utama iaitu:

- i. aspek tadbir urus;
- ii. pengurusan dan penyelarasan yang berkesan;
- iii. peranan agensi yang jelas;
- iv. peningkatan keupayaan melalui penggunaan teknologi terkini; dan
- v. peningkatan kemahiran, pengetahuan dan pendidikan.

7. Dalam mempertingkatkan perlindungan daripada serangan siber dari dalam dan luar negara, pelaksanaan MCSS akan turut menumpukan kepada peningkatan keupayaan NC4 yang akan turut memperluaskan *visibility* pemantauan dengan merangkaikan kepada semua pusat pemantauan di dalam negara termasuk pusat pemantauan yang dikendalikan oleh syarikat swasta, mewujudkan *Sectoral Cyber Command Centre* (melalui sistem NC4) dan sistem pemantauan rapi terhadap sistem kritikal negara. Sistem NC4 juga akan dilengkapi dengan sistem pengurusan insiden yang lebih berkesan bagi meningkat pengurusan insiden siber melibatkan Pasukan Tindakbalas Kecemasan Komputer dengan izin (*Computer Emergency Response Team (CERT)*) diperingkat ketua sektor dan agensi CNII.

8. Melalui inisiatif komprehensif yang digariskan ini, Kerajaan dapat mengetahui situasi keselamatan siber semasa dan tahap kesiapsiagaan negara dalam memastikan ia dilindungi daripada risiko ancaman siber daripada dalam dan luar negara. Pelaksanaan MCSS juga digariskan sebagai strategi yang akan dirujuk dalam RMKe-12 2021-2025 aspek pengukuhan keselamatan siber dalam Strategi A1: Menyediakan Persekitaran Yang Menyokong Pertumbuhan Ekonomi Digital.

Sekian, terima kasih.

**PEMBERITAHUAN PERTANYAAN LISAN**  
**MESYUARAT KEDUA, PENGGAL KEEMPAT, PARLIMEN KE-14**  
**DEWAN RAKYAT**

**PERTANYAAN : LISAN**

**DARIPADA : DATUK WILSON UGAK ANAK KUMBONG [ HULU RAJANG ]**

**TARIKH : 28 OKTOBER 2021 (KHAMIS)**

**SOALAN : 11**

**DATUK WILSON UGAK ANAK KUMBONG [ HULU RAJANG ]** minta **PERDANA MENTERI** menyatakan sejauh manakah proses perundingan Perjanjian Malaysia 1963 (MA63) sedang giat dijalankan dan bilakah Kerajaan Persekutuan akan memuktamadkan segala proses perbincangan ini.

**JAWAPAN: YB DATO HAJJAH HANIFAH HAJAR TAIB**  
**TIMBALAN MENTERI DI JABATAN PERDANA MENTERI**  
**(HAL EHWAL SABAH DAN SARAWAK)**

Tuan Yang di-Pertua,

1. Untuk makluman Ahli Yang Berhormat Hulu Rajang, secara keseluruhan, semenjak diluluskan penubuhannya oleh Jemaah Menteri pada 9 September 2020, Majlis Khas Mengenai Perjanjian Malaysia 1963 (**Majlis Khas MA63**) telah bermesyuarat sebanyak 3 kali iaitu pada **2 Disember 2020, 13 April 2021 dan 18 Oktober 2021**.

2. Seperti mana Ahli Yang Berhormat sedia maklum, keputusan-keputusan yang telah dicapai di bawah Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKKMA63) sebelum ini merupakan keputusan dasar yang mana masih memerlukan tindakan lanjut sebelum dapat dilaksanakan sepenuhnya. Walau

bagaimanapun, sukacita saya ingin memaklumkan bahawa terdapat beberapa perkara telah selesai dibincangkan dan telah dibawa untuk perakuan Majlis Khas 1963 untuk dilaksanakan seperti berikut:

- (i) Penyerahan Kuasa Kawal Selia Pengeedaran Gas (*Liquefied Petroleum Gas* – LPG) Kepada Kerajaan Negeri Sarawak telah selesai dilaksanakan sepenuhnya pada 1 Jun 2021 dan telah dirasmikan oleh YAB Ketua Menteri Sarawak pada 9 September 2021;
- (ii) Kuasa Pentadbiran ke Atas Pulau Sipadan dan Pulau Ligitan Kepada Kerajaan Negeri Sabah, Majlis Khas MA63 bersetuju supaya Perintah Kawasan Larangan dan Tempat Larangan bagi kedua-dua pulau dibatalkan namun tanggungjawab berhubung keselamatan adalah masih di bawah Kerajaan Persekutuan;
- (iii) Cadangan Rang Undang-Undang Perlembagan Persekutuan (Pindaan) 2021 pula telah diperakukan oleh Majlis Khas MA63 pada 18 Oktober 2021 dan telah dibawa kepada Jemaah Menteri pada 21 Oktober 2021. Bacaan Kali Pertama dan Bacaan Kali Kedua RUU adalah pada sidang mesyuarat Parlimen kali ini.
- (iv) *Empowerment* Pelesenan Laut Dalam Sabah turut diperakukan oleh Majlis Khas dalam mesyuarat yang sama. Pelaksanaan (dengan izin) *empowerment* Pelesenan Perikanan Laut Dalam Sabah dijangka akan mula dilaksanakan pada Disember 2021. Majlis Khas juga bersetuju supaya kuasa yang sama juga dipanjangkan kepada Pengarah Jabatan Perikanan Laut Sarawak.

3. Selain itu, terdapat juga isu-isu lain yang sedang dibincangkan di peringkat Jawatankuasa Kerja yang ditubuhkan di bawah Majlis Khas MA63 iaitu seperti:

- (i) Semakan semula berhubung isu-isu pentadbiran badan kehakiman di Sabah dan Sarawak di bawah Jawatankuasa Kerja Rakan Sekutu;
- (ii) Perkara berkaitan keselamatan negeri seperti isu sempadan negeri Sarawak, isu imigresen seperti IMM13, Burung-Burung, Kad Banci dan PATI di negeri Sabah di bawah Jawatankuasa Kerja Keselamatan Negeri Sabah dan Sarawak;
- (iii) Keperluan infrastruktur asas di negeri Sabah dan Sarawak seperti jalan raya, air/elektrik, kesihatan, pendidikan, digital, kemiskinan dan perumahan rakyat di bawah Jawatankuasa Kerja Sosioekonomi; dan
- (iv) Semakan Semula Pemberian Khas di bawah Perkara 112D Perlembagaan Persekutuan.

Kerajaan Persekutuan juga berharap supaya perkara ini dapat dimuktamadkan dengan kadar segera.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN MA'MUN BIN SULAIMAN  
[ KALABAKAN ]**

**TARIKH : 28 OKTOBER 2021 (KHAMIS)**

**SOALAN**

**Tuan Ma'mun bin Sulaiman [ Kalabakan ]** minta **MENTERI ALAM  
SEKITAR DAN AIR** menyatakan status terkini pembinaan Empangan Air  
Gudang 4, Tawau yang sangat diperlukan oleh seluruh warga Tawau dan  
Kalabakan yang sering menghadapi krisis bekalan air dan dalam masa  
yang sama menjadi tebatan banjir.

**JAWAPAN**

Tuan Yang di-Pertua,

1. Untuk makluman, projek yang dimaksudkan oleh YB Kalabakan adalah Skim Bekalan Air Tawau Fasa III: Rekabentuk dan Pembinaan Empangan Air. Projek ini diurus dan dikendalikan oleh Jabatan Air Negeri Sabah (JANS) selaku Pegawai Penguasa dan telah dimulakan pada 26 Januari 2020. Projek ini dilaksanakan dengan nilai kontrak berjumlah RM451 juta dan dijadualkan siap pada 26 Januari 2024. Namun sehingga 30 September 2021 peratus kemajuan hanyalah sebanyak 5% sahaja berbanding yang dijadualkan sebanyak 26%. Ini bermakna ianya telah mengalami kelewatan sebanyak -21%.

2. Kelewatan ini adalah berpunca dari pelbagai isu seperti isu pertukaran kerajaan, isu pengambilan balik tanah, isu kelulusan EIA untuk kuari, isu kelulusan lesen peletupan di kuari dan isu-isu yang berkaitan dengan pelaksanaan PKP seperti pemberhentian kerja, kekurangan pekerja dan bahan binaan.

3. Walau bagaimanapun, hampir kesemua isu tersebut telah selesai dan pihak kontraktor dijangka dapat meneruskan semula kerja-kerja mereka selepas ini. Projek ini dijangka siap pada Oktober 2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. SHAMSUL ANUAR BIN HAJI  
NASARAH [ LENGGONG ]**

**TARIKH : 28 OKTOBER 2021 (KHAMIS)**

**SOALAN:**

Minta **PERDANA MENTERI** menyatakan usaha membanteras pencerobohan siber dan penjualan data peribadi melibatkan pasaran gelap (*dark web*) terutamanya melibatkan data daripada agensi Kerajaan.

**JAWAPAN:**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

**Tuan Yang di-Pertua,**

1. Kerajaan telah mengambil langkah proaktif bagi meningkatkan tahap kesiapsiagaan negara dalam menghadapi ancaman dan serangan siber melalui pembangunan dan pelaksanaan Pelan Pengurusan Krisis Siber Negara (*National Cyber Crisis Management Plan – NCCMP*) pada tahun 2008 lagi.
2. Pelan ini dibangunkan berdasarkan kepada rangka kerja pengurusan risiko menggariskan strategi bagi mengurangkan kesan serangan siber dan tindakbalas yang perlu dilaksanakan oleh agensi Infrastruktur Maklumat Kritikal Negara (*Critical National Information Infrastructure – CNII*) yang terdiri daripada agensi awam dan swasta. Pelan ini seterusnya diterjemahkan kepada Arahan Majlis Keselamatan Negara.
3. Kerajaan juga telah mewujudkan (*National Cyber Coordination and Command Centre - NC4*) yang telah beroperasi pada tahun 2016 bagi memantau dan menangani sebarang insiden dan siber termasuk pencerobohan siber dan penjualan data peribadi melibatkan agensi/organisasi CNII yang merangkumi sektor awam dan swasta.
4. Dengan komitmen tinggi Kerajaan yang telah meletakkan penggunaan teknologi digital dan ICT sebagai pemacu pembangunan negara dan sosio-ekonomi telah turut membuka ruang kepada ancaman siber yang semakin rumit dan sukar diramal. *Dark Web* meningkatkan lagi cabaran untuk menangani ancaman keselamatan siber ini. Aktiviti-aktiviti jenayah yang dahulunya berlaku secara fizikal telah beralih kepada platform *dark web* sebagai saluran penjualan dan pembayaran kerana sukar untuk dikesan.

5. Oleh itu, bagi memperkukuhkan lagi tahap keselamatan siber negara, Kerajaan melalui Agensi Keselamatan Siber Negara, Majlis Keselamatan Negara (NACSA, MKN) telah melancarkan Strategi Keselamatan Siber Malaysia (*Malaysia Cyber Security Strategy* (MCSS)) 2020-2024 pada 12 Oktober 2020 yang menggariskan tindakan strategik bagi menangani ancaman keselamatan siber termasuk pencerobohan siber melalui pendekatan bersepadu meliputi pelbagai aspek keselamatan siber secara holistik dan terselaras. Strategi ini menekankan lima (5) tonggak utama iaitu:

- a) aspek tadbir urus;
- b) pengurusan dan penyelarasan yang berkesan;
- c) peranan agensi yang jelas;
- d) peningkatan keupayaan melalui penggunaan teknologi terkini; dan
- e) peningkatan kemahiran, pengetahuan dan pendidikan.

6. MCSS juga menggariskan tindakan strategik bagi memperkukuhkan keupayaan negara untuk meramal, mengesan, menghalang dan bertindakbalas kepada ancaman siber melalui pendekatan bersepadu dengan kerjasama yang efektif antara sektor awam dan swasta yang meliputi aspek pengumpulan maklumat risikan siber (*cyber intelligence*) dalam platform *dark web* ini. Melalui inisiatif komprehensif yang digariskan ini, tahap keselamatan lanskap digital negara dapat dipertingkatkan dan memastikan ia dilindungi daripada risiko ancaman siber.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHAN FOONG HIN  
[KOTA KINABALU]**

**TARIKH : 28 OKTOBER 2021 (KHAMIS)**

**SOALAN**

**TUAN CHAN FOONG HIN [ KOTA KINABALU ]** minta **MENTERI KANAN PERDAGANGAN ANTARABANGSA DAN INDUSTRI** menyatakan jenis pemindahan teknologi, pengetahuan kemahiran dan latihan pekerja dalam kerjasama antara Proton dan Geely sejak tahun 2016.

**JAWAPAN**

Tuan Yang di-Pertua,

1. DRB-HICOM dan Geely telah memeterai Penjanjian Pemegang Saham dalam PROTON pada September 2017. Gabungan tersebut adalah bagi menjayakan pelan pemulihan dalam memacu prestasi jualan dan pengeluaran PROTON diperingkat domestik dan antarabangsa. Melalui kerjasama ini juga, PROTON akan berpeluang menikmati pelbagai faedah seperti akses kepada pasaran sedia ada Geely di luar China dan Malaysia, memiliki akses kepada model, platform penyelidikan dan teknologi Geely serta peluang peningkatan kemahiran tenaga kerja PROTON di pusat-pusat penyelidikan dan pembuatan Geely di luar negara.
2. Susulan daripada itu, beberapa program pemulihan prestasi PROTON telah dilaksanakan bagi memastikan PROTON terus menjadi entiti perniagaan yang mampan dan berdaya saing di arena automotif seperti berikut:
  - i. Pembangunan model PROTON X70 dan PROTON X50 melibatkan aktiviti teknikal seperti kejuruteraan-semula bagi memenuhi piawaian di Malaysia dan pengenalan teknologi baharu seperti Enjin *Turbocharged Gasoline Direct Injection* (TGDI), *Intelligent Connectivity with Voice Command*, sistem *Autonomous Level-1 (foot off)* dan *Level-2 (foot off and hands off)*, serta sistem keselamatan pasif, aktif dan kognitif;
  - ii. Penyediaan kapasiti pengilangan enjin dan kenderaan yang dapat meningkatkan prestasi di kilang PROTON Tanjung Malim, terutamanya selepas aktiviti pengeluaran model Proton X70 bermula pada Disember 2019 dan Proton X50 pada September 2020;

- iii. Program latihan pekerja bagi aktiviti yang melibatkan proses pengeluaran model baharu, terutamanya yang membabitkan pemasangan komponen berteknologi baharu; dan
- iv. Program '*match-making*' di antara pembekal tempatan Malaysia dengan syarikat pengeluar komponen dari China yang turut diselia oleh PROTON. Aktiviti ini melibatkan beberapa pengenalan teknologi baharu seperti *Intelligent Head Unit (IHU)*, *Slush-moulded Instrument Panel*, *NAPPA leather trim*.

3. Selain itu, PROTON sedang membuat kajian bagi melaksanakan semula beberapa program yang tertangguh disebabkan pandemik COVID-19 termasuk program pembangunan kenderaan elektrik.

4. Susulan program pemulihan ini, PROTON telah berjaya meningkatkan penguasaan pasaran domestik industri automotif daripada 10.8% (2018) kepada 16.6% (2019) dan 20.7% (2020) dengan jumlah bilangan kenderaan jualan meningkat daripada 64,744 unit (2018) kepada 100,497 (2019) dan 109,716 unit (2020). Bagi tahun ini sehingga September 2021, PROTON telah berjaya menguasai pasaran domestik sebanyak 22.9% dengan jumlah kenderaan jualan sebanyak 73,017 unit. Dari segi eksport pula, PROTON telah berjaya meningkatkan eksport iaitu 1,388 unit pada 2018, 911 unit bagi 2019 dan 1,508 untuk tahun 2020 berbanding eksport pada tahun 2017 berjumlah 230 unit sahaja. Kerjasama strategik DRB-HICOM dan Geely melalui program pemulihan telah menunjukkan peningkatan keupayaan PROTON dalam sektor automotif negara.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATO' SRI TIONG KING SING [BINTULU]**

**TARIKH : 28 OKTOBER 2021 (ISNIN)**

**SOALAN**

**Dato' Sri Tiong King Sing [Bintulu]** minta **MENTERI LUAR NEGERI** menyatakan apakah usaha Malaysia mengukuhkan kestabilan dan keselamatan ASEAN selepas penubuhan AUKUS?

**JAWAPAN**

Tuan Yang di-Pertua,

Saya mengucapkan terima kasih kepada **Yang Berhormat Bintulu** atas pertanyaan yang dikemukakan berhubung kerjasama keselamatan tiga hala antara Australia, United Kingdom dan Amerika Syarikat, yang dikenali sebagai AUKUS.

Tuan Yang di-Pertua,

2. Kerajaan sentiasa peka terhadap isu-isu yang melibatkan keselamatan, keamanan dan kestabilan rantau ini. Pendirian Kerajaan mengenai penubuhan AUKUS pada 16 September 2021 adalah jelas dan konsisten, berdasarkan kenyataan media oleh YAB Perdana Menteri pada 18 September 2021 berhubung isu ini.

4. Selain bimbang AUKUS boleh memangkin persaingan kuasa dan senjata di rantau ini, Kerajaan juga gusar sekiranya penubuhan AUKUS memprovokasi kuasa-kuasa besar yang lain untuk bertindak lebih agresif, terutamanya di Laut China Selatan. Sekiranya ini berlaku, negara-negara di rantau ini, termasuk Malaysia, akan berada dalam situasi yang rumit, dan usaha mengekalkan Laut China Selatan sebagai laluan perdagangan dan perairan yang aman akan menjadi sukar.

5. Justeru itu, Kerajaan sentiasa menyeru semua pihak di peringkat dua hala, serantau dan pelbagai hala untuk bekerjasama dalam mempertahankan Asia Tenggara sebagai rantau yang aman, stabil serta berkembang dan makmur. Ini selaras dengan prinsip yang digariskan di bawah *ASEAN Outlook on the Indo-Pacific*, Zon Aman, Bebas dan Berkecuali (ZOPFAN), Perjanjian Zon Bebas Senjata Nuklear Asia Tenggara (SEANWFZ) dan Triti Persahabatan dan Kerjasama di Asia Tenggara (TAC). Dokumen-dokumen ini menggariskan tatacara menjalinkan hubungan di rantau Asia Tenggara dalam usaha untuk memastikan rantau ini kekal berkecuali, selamat, stabil dan aman.

6. Malaysia terus menyeru semua pihak untuk mengelakkan tindakan yang boleh menimbulkan ketegangan dan bersifat provokatif, mengamalkan *self-restraint*, dan mengelakkan tindakan berkaitan ketenteraan, atau *militarisation*. Pendirian ini juga telah disuarakan dengan konsisten di platform-platform serantau dan antarabangsa.

7. Saya sendiri telah mengulangi pendirian Malaysia berhubung AUKUS melalui beberapa sesi perbincangan dengan negara-negara AUKUS, termasuk semasa sesi percakapan telefon antara saya dengan Menteri Luar Negeri Australia pada 14 Oktober 2021. YB Menteri Kanan Pertahanan juga telah menjawab beberapa persoalan berkait keselamatan dan kapal selam berkuasa nuklear pakatan AUKUS dalam Dewan ini.

8. Di peringkat ASEAN, termasuk dalam penglibatan dengan Rakan-rakan Dialog ASEAN, Kerajaan akan terus mendokong prinsip Kepaksian ASEAN atau '*ASEAN Centrality*' dan mengetengahkan pandangan dan pendirian berprinsip Malaysia, terutamanya dalam usaha Malaysia menangani perkembangan isu politik-keselamatan semasa, termasuklah yang berkaitan dengan kerjasama AUKUS. Sebagai contoh, YAB PM sekali lagi telah mengulangi pendirian Malaysia mengenai AUKUS semasa dengan izin, *East Asia Summit* semalam, 27 Oktober 2021.

9. Akhir kata, Malaysia sentiasa mengambil inisiatif untuk mengimbangkan hubungannya dengan kuasa-kuasa besar melalui dialog bagi membincang serta menyelesaikan isu-isu berkepentingan bersama. Kementerian Luar Negeri akan memastikan bahawa komunikasi dengan kuasa-kuasa besar ini akan sentiasa terbuka dan berterusan. Kerajaan juga akan terus memastikan bahawa hak-hak negara berlandaskan undang-undang negara dan antarabangsa dihormati, dan Kerajaan Malaysia berupaya melindungi kepentingan negara tanpa melibatkan campur tangan kuasa asing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : TUAN CHOW KON YEOW [ TANJONG ]**

**TARIKH : 28 OKTOBER 202 (KHAMIS)**

**SOALAN**

**TUAN CHOW KON YEOW [ TANJONG ]** minta **MENTERI ALAM SEKITAR DAN AIR** menyatakan peranan pihak Kementerian dalam menjayakan Skim Penyaluran Air Mentah Sungai Perak (SPRWTS) bagi menangani masalah *margin* penyimpanan bekalan air mentah yang rendah di Pulau Pinang. Apakah perancangan/tindakan Kementerian bagi memastikan bekalan air mencukupi untuk penduduk, keperluan industri dan agrikultur negeri-negeri utara Semenanjung pada musim kering.

**JAWAPAN**

Tuan Yang Di-Pertua,

1. Untuk makluman Ahli Yang Berhormat, merujuk kepada rekod daripada Suruhanjaya Perkhidmatan Air Negara (SPAN), rizab margin Negeri Pulau Pinang bagi suku kedua tahun 2021 adalah sebanyak 30.1% iaitu merupakan antara negeri yang mempunyai rizab margin yang tinggi di Semenanjung dan Wilayah Persekutuan Labuan berbanding negeri-negeri lain seperti Selangor 17.1%, Johor 12%, Kedah 0% dan Kelantan 0%.

Tuan Yang Di-Pertua,

2. Sepertimana Ahli Yang Berhormat sedia maklum, hal-hal yang berkaitan sumber air sebagaimana yang telah termaktub di bawah Jadual Kesembilan, Senarai II, Perlembagaan Persekutuan adalah terletak di bawah bidang kuasa Kerajaan Negeri.

3. Peranan Kementerian dalam menjayakan Skim Penyaluran Air Mentah Sungai Perak (SPRWTS) adalah sebagai pemudah cara, pembiaya dan pelaksana kepada skim tersebut. Itupun hanya setelah Kerajaan Negeri Pulau Pinang dan Kerajaan Negeri Perak mencapai persetujuan untuk melaksanakannya. Tanpa persetujuan tersebut tiada apa-apa tindakan yang boleh diambil oleh Kerajaan Persekutuan.

4. Sementara itu ingin saya maklumkan bahawa perkhidmatan bekalan air disediakan oleh operator air negeri masing-masing. Operator air ini hampir kesemuanya dimiliki oleh Kerajaan Negeri. Fungsi Kementerian Alam Sekitar dan Air (KASA) adalah menetapkan hala tuju dan polisi sektor air negara, manakala fungsi kawalselia dilaksanakan oleh Suruhanjaya Perkhidmatan Air Negara dan pembiayaan pembangunan aset-aset bekalan air oleh Pengurusan Aset Air Berhad (PAAB) berdasarkan pendekatan 'bina dan pajak', atau dengan izin, *build and lease* bagi negeri-negeri yang telah memuktamadkan penstrukturan semula industri perkhidmatan bekalan air.

5. Untuk itu bagi memastikan bekalan air mencukupi semasa musim kering; kerajaan Negeri bersama operator air dan lain-lain agensi negeri yang berkaitan haruslah membuat persediaan awal dengan mengenal pasti risiko dan menyediakan pelan tindakan kecemasan bagi memastikan bekalan air adalah mencukupi untuk semua pemegang taruh dan gangguan adalah adalah ditahap yang paling minima.

6. Pada masa yang sama langkah-langkah pengurusan permintaan dengan izin *demand management* perlu ditingkatkan dan dilaksanakan melalui pengurangan penggunaan air perkapita, pengurangan air tak berhasil (NRW) dan penggunaan sumber alternatif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS 2021**

**PERTANYAAN : LISAN**

**DARIPADA : TUAN LUKANISMAN BIN AWANG SAUNI  
[ SIBUTI ]**

**TARIKH : 28 OKTOBER 2021 (KHAMIS)**

**SOALAN**

**TUAN LUKANISMAN BIN AWANG SAUNI [ SIBUTI ]** minta **PERDANA MENTERI** menyatakan sejak Petronas menandatangani *Commercial Settlement Agreement* dengan Kerajaan Sarawak berapa jumlah vendor tempatan Sarawak didaftar dengan Petronas dan berapa jumlah pengagihan pendapatan dari kerja-kerja yang diberikan oleh Petronas diperoleh oleh Sarawak.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Jumlah vendor tempatan Sarawak yang berdaftar dengan PETRONAS pada suku kedua tahun 2021 adalah berjumlah 592 vendor.
2. Berdasarkan perbelanjaan perolehan, jumlah nilai perbelanjaan (*spend value*) kepada vendor-vendor tempatan Sarawak dari Disember tahun 2020 hingga suku kedua tahun 2021 mencecah RM1.76 bilion, iaitu RM1.00 bilion di dalam Sarawak dan RM0.76 bilion di luar Sarawak. Ini adalah hasil daripada keberkesanan program-program yang dilaksanakan oleh PETRONAS dengan kerjasama Kerajaan Negeri Sarawak. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' WIRA HAJI AMIRUDDIN BIN HAJI  
HAMZAH [KUBANG PASU]**

**TARIKH : 28 OKTOBER 2021**

**SOALAN**

**DATO' WIRA HAJI AMIRUDDIN BIN HAJI HAMZAH [KUBANG PASU]** minta **MENTERI KANAN PERDAGANGAN ANTARABANGSA DAN INDUSTRI** menyatakan pelan dan strategi Kerajaan dalam memartabatkan Malaysia sebagai pemain utama ekonomi Islam global dan tidak hanya terhad kepada kewangan Islam sahaja.

**JAWAPAN**

Tuan Yang di-Pertua,

Pasaran ekonomi Islam global merupakan antara penyumbang besar dalam pertumbuhan ekonomi dan peningkatan taraf hidup sosioekonomi masyarakat dunia. Ia bukan sahaja merangkumi bidang kewangan Islam malah meliputi perindustrian halal seperti penghasilan produk makanan & minuman, produk farmaseutikal serta produk-produk kosmetik & penjagaan diri. Dengan peningkatan jumlah penduduk Muslim dunia, saiz pasaran halal antarabangsa dijangka berkembang daripada USD2.4 trilion pada 2020 kepada USD7.7 trilion (RM32.2 trilion) menjelang tahun 2030. Sejajar matlamat Kerajaan di bawah RMKe-12 dan Wawasan Kemakmuran Bersama 2030 (WKB 2020), industri halal dikenal pasti sebagai antara industri strategik dan aktiviti pertumbuhan ekonomi utama yang menyumbang kepada kemapanan pertumbuhan ekonomi negara.

Dalam tempoh RMKe-11, pelbagai inisiatif telah dilaksanakan bagi memastikan pembangunan industri halal tempatan yang bersepadu dan komprehensif. Usaha telah ditumpukan kepada pembangunan standard dan pensijilan halal, penjenamaan dan promosi serta pengkomersialan produk dan perkhidmatan halal. Industri halal negara berkembang pada kadar purata 5.5% setahun dalam tempoh 2016 hingga 2019. Selain itu, nilai eksport halal telah meningkat, daripada RM39.4 bilion pada tahun 2016 kepada RM40.6 bilion pada tahun 2019. Jumlah pelaburan kumulatif di 22 taman industri halal sedia ada adalah sebanyak RM2.8 bilion sehingga tahun 2020, di mana 55% adalah merupakan pelaburan langsung asing.

Dalam menjadikan Malaysia sebagai peneraju ekonomi Islam global, Pelan Induk Industri Halal 2030 (*Halal Industry Master Plan 2030-HIMP*) memberi tumpuan terhadap keperluan dan potensi pembangunan industri halal dengan memfokuskan kepada sub-sektor terpilih yang mempunyai nilai ditambah yang tinggi, menggalakkan penyertaan aktif syarikat perusahaan mikro, kecil dan sederhana (PMKS) serta mempergiat pengkomersilan produk R&D dan inovasi halal. Pelaksanaan HIMP 2030 akan dapat mengukuhkan ekosistem industri halal tempatan yang seterusnya meningkatkan perdagangan dan pelaburan negara, mencipta peluang pekerjaan dan mengukuhkan integriti rantai bekalan halal.

43 inisiatif telah dikenalpasti yang merangkumi dasar dan kerangka kawal selia mesra industri Halal, meneroka pasaran eksport baru, mewujudkan kumpulan pakar industri Halal, meningkatkan kualiti infrastruktur di taman industri halal serta mengenalpasti *Halal Champions* iaitu syarikat-syarikat peneraju dalam segmen produk masing-masing.

Tuan Yang di-Pertua,

Dalam memperkasakan perdagangan, perniagaan dan ekonomi digital, usaha dipergiat bagi meningkatkan akses kepada kewangan Islam untuk memenuhi keperluan sektor ekonomi serta menggalakkan pertumbuhan sektor strategik negara seperti industri halal. Bank-bank Islam telah menjalin perkongsian strategik dengan HDC untuk meningkatkan akses



kepada pembiayaan dan perlindungan takaful serta melancarkan program khidmat nasihat perniagaan dan pepadanan perniagaan yang menghubungkan usahawan dengan bakal pembeli melalui e-pasaran (*e-marketplace*).

HDC melalui Halal Integrated Platform (HIP) telah merangka program pembiayaan khas dengan usahasama institusi kewangan untuk manfaat syarikat-syarikat yang berdaftar dengan HIP. Di antara program pembiayaan yang diperkenalkan termasuk *Go-Halal Financing Program* dengan penyediaan dana berjumlah RM100 juta melalui usahasama HDC dan Bank Islam Malaysia Berhad. Peserta yang berdaftar di bawah HIP boleh memohon *Go-Halal Financing* bagi membiayai aktiviti pemasaran produk, peningkatan keupayaan dan kapasiti serta penambahbaikan fasiliti perniagaan.

Bagi mengukuhkan ekonomi dan kewangan Islam di Malaysia dengan kerjasama entiti antarabangsa, pada bulan Mac tahun ini, Bank Pembangunan Islam (Islamic Development Bank, IsDB) telah menubuhkan pusat kecemerlangan (*Centre of Excellence, CoE*) di Malaysia. Penubuhan CoE ini akan meningkatkan hubungan strategik Malaysia dengan negara anggota IsDB dalam bidang kerjasama seperti kewangan Islam dan industri halal, serta akan mengukuhkan potensi dan peranan Malaysia sebagai pemain utama ekonomi dan kewangan Islam global.

Tuan Yang di-Pertua,

Adalah disasarkan industri halal tempatan akan bertumbuh 4.4% secara purata tahunan bagi tempoh sehingga 2025. Pembangunan industri halal yang diterajui oleh MITI dan kementerian-kementerian lain yang berkaitan akan dapat terus memacu pertumbuhan industri ini serta mempertingkatkan akses syarikat-syarikat tempatan ke rantai serantau dan global dalam pasaran halal antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS 2021**

**PERTANYAAN : LISAN**

**DARIPADA : DATO' HAJI CHE ABDULLAH BIN MAT NAWI  
[TUMPAT]**

**TARIKH : 28 OKTOBER 2021 (KHAMIS)**

**SOALAN**

**DATO' HAJI CHE ABDULLAH BIN MAT NAWI [TUMPAT]** minta **PERDANA MENTERI** menyatakan perkembangan terkini rancangan pembinaan Jambatan Palekbang – Kota Bharu.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pembinaan Jambatan Palekbang – Kota Bharu adalah dalam peringkat akhir rekabentuk terperinci. Mengikut perancangan, pelantikan Kontraktor adalah dijangka pada penghujung Februari 2022 dan pembinaan akan bermula pada Mac 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' WIRA HAJI MOHD. ANUAR BIN  
MOHD. TAHIR (TEMERLOH)**

**TARIKH : 28 OKTOBER 2021 (KHAMIS)**

**SOALAN**

**DATO' WIRA HAJI MOHD. ANUAR BIN MOHD. TAHIR [ TEMERLOH ]** minta **MENTERI KANAN KERJA RAYA** menyatakan tentang inisiatif Kementerian untuk meningkatkan kualiti pelaksanaan "*Temporary Road Diversion / Traffic Management Plan*" yang sering kali menimbulkan kesesakan serta kekeliruan pengguna jalan raya akibat dari pembinaan jalan serta utiliti oleh syarikat-syarikat utiliti. Kerosakan tampalan jalan selepas pembinaan juga sering mengakibatkan kesesakan dan kemalangan yang merugikan ekonomi negara.

**JAWAPAN**

Tuan Yang Di-Pertua,

Untuk makluman Ahli Yang Berhormat Senator, Jabatan Kerja Raya (JKR) Malaysia telah menyediakan garis panduan Pelan Pengurusan Trafik atau dikenali juga sebagai *Traffic Management Plan (TMP)* untuk kerja-kerja pembinaan mahupun penyenggaraan jalan yang perlu mematuhi Arahan Teknik Jalan (ATJ 2C/85) Pindaan 2017 - *Manual on Traffic Control Devices Temporary Signs and Work Zones Control*. Tujuan TMP ini adalah untuk memastikan pergerakan dan keselamatan pekerja serta menyediakan laluan selamat untuk pemandu kenderaan, pejalan kaki dan mengelakkan kesesakan lalu lintas.

Manakala bagi kerja-kerja pembinaan jalan raya baharu atau menaik taraf jalan raya sedia ada, *Standard Operating Procedure (SOP)* adalah merangkumi:

- 1) Pelan Pengurusan Trafik (TMP) Sewaktu Pembinaan; di mana ia perlu disediakan oleh Kontraktor di peringkat awal kerja-kerja pembinaan dan perlu disemak oleh Auditor Keselamatan Jalan serta diluluskan oleh Pegawai Penguasa (SO). TMP ini akan diaudit setiap tiga (3) bulan oleh Auditor Keselamatan Jalan sepanjang tempoh pembinaan untuk memastikan keselamatan pengguna jalan raya dan keadaan trafik diuruskan dengan baik;
- 2) *Standard Operation Procedure (SOP)* bagi Keselamatan Pekerja; dan
- 3) *Emergency Response Plan (ERP)* sekiranya berlaku kemalangan di kawasan tapak bina.

Bagi kerja-kerja penyenggaraan di Jalan-Jalan Persekutuan pula, pihak syarikat-syarikat konsesi Jalan Persekutuan perlu mengemukakan Pelan Pengurusan Trafik (TMP) yang telah diperakui oleh Pegawai Pengurusan

Trafik (*Traffic Management Officer*, TMO) kepada JKR Daerah untuk kelulusan sebelum memulakan sesuatu kerja.

Bagi kerja-kerja oleh pihak syarikat utiliti pula, pengemukaan TMP yang disediakan oleh TMO dengan merujuk kepada Arahan Teknik Jalan terkini, merupakan antara syarat yang perlu dipatuhi oleh pihak utiliti sebelum permit (kebenaran) kerja penanaman utiliti dikeluarkan oleh pihak JKR Negeri. Selanjutnya, pihak utiliti perlu memantau kerja-kerja yang dilaksanakan selaras dengan TMP tersebut.

Untuk mengelakkan terjadinya kesesakan lalu lintas yang teruk terutamanya pada waktu puncak, kerja-kerja penyenggaraan jalan raya hanya dibenarkan untuk dilaksanakan pada waktu malam bermula pada pukul 12.00 tengah malam sehingga 5.00 pagi. Kementerian Kerja Raya sentiasa komited dalam melaksanakan program penyenggaraan jalan persekutuan bagi memastikan pengguna jalan raya sentiasa berada dalam keadaan selamat dan selesa.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB PUAN ISNARAISAH MUNIRAH BINTI  
MAJILIS (KOTA BELUD)**

**TARIKH : 28 OKTOBER 2021 (KHAMIS)**

**SOALAN**

**PUAN ISNARAISAH MUNIRAH BINTI MAJILIS [ KOTA BELUD ]** minta **MENTERI KANAN KERJA RAYA** menyatakan dengan kenaikan kos bahan binaan di seluruh dunia, berapa anggaran kos tambahan bagi menyiapkan Projek Lebuh Raya Pan Borneo (Pakej Sabah).

**JAWAPAN**

Tuan Yang Di-Pertua,

Untuk makluman Ahli Yang Berhormat, pelaksanaan projek Lebuhraya Pan Borneo Sabah Fasa 1 dengan anggaran jarak keseluruhan 706 km dibahagikan kepada 35 pakej kerja. Sehingga kini, 12 pakej kerja telah dibuat pelantikan kontraktor bagi tujuan kerja-kerja pembinaan dengan status kemajuan pembinaan sehingga September 2021 bagi pakej kerja yang telah dimulakan adalah 60%. Manakala, Surat Setuju Terima (SST) bagi tiga (3) pakej kerja baharu yang melibatkan laluan daripada Sandakan Mile 32 sehingga Sg. Baoto telah dikeluarkan dan kerja-kerja pembinaan 3 pakej tersebut akan bermula pada tahun ini. Manakala satu (1) pakej kerja baharu yang melibatkan laluan dari Serusup ke Pituru pula telah diperuntukkan di dalam RP1 RMKe-12, menjadikan keseluruhan 16 pakej kerja akan dilaksanakan buat masa kini.

Sama seperti projek-projek Kerajaan lain, wabak Covid-19 telah memberi kesan ke atas tempoh kemajuan kerja dan kos pembinaan Projek LPB Sabah. Sehubungan itu pelbagai *mitigation plan* sedang dilaksanakan antara lainnya penyelarasan semula jadual pembinaan dan Lanjutan Masa (*Extension Of Time* - EOT) bagi memastikan kelancaran dan kelangsungan projek. Dengan mengambil kira peningkatan harga bahan binaan di pasaran, Kerajaan turut mempertimbangkan permohonan *Variation of Price* (VOP) tertakluk kepada kadar dan terma-terma yang ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA PENGGAL KEEMPAT,  
PARLIMEN KEEMPAT BELAS (2021)**

---

**PERTANYAAN : LISAN**

**DARIPADA : PUAN HANNAH YEOH TSEOW  
SUAN [ SEGAMBUT ]**

**TARIKH : 28 OKTOBER 2021 (KHAMIS)**

**SOALAN**

**Puan Hannah Yeoh Tseow Suan [ Segambut ]** minta **MENTERI WILAYAH PERSEKUTUAN** menyatakan langkah-langkah yang telah diambil untuk memastikan Yayasan Wilayah Persekutuan berfungsi mengikut syor-syor Jawatankuasa Kira-kira Wang Negara (PAC).



**JAWAPAN**

**Tuan Yang di-Pertua,**

Kementerian Wilayah Persekutuan mengambil maklum bahawa semasa **pembentangan Laporan Jawatankuasa Kira-kira Wang Negara (PAC)** berhubung **penjualan tanah milik Dewan Bandaraya Kuala Lumpur (DBKL) pada 17 November 2020**, PAC telah membuat **pengesyoran** perkara-perkara berikut:-

Para 7.3 : Supaya Kerajaan perlu mengkaji semula fungsi dan kesesuaian Yayasan Wilayah Persekutuan (YWP) selari dengan hasrat penubuhan bagi melindungi kebajikan warga kota Kuala Lumpur. Struktur dan amalan YWP yang sedia ada tidak membolehkan penglibatan Menteri Wilayah Persekutuan dan Datuk Bandar Kuala Lumpur tanpa kewujudan konflik kepentingan; dan

Para 7.4 : Status YWP hendaklah diubah menjadi sebuah badan berkanun bagi membolehkan pemantauan yang lebih efektif oleh pihak Kerajaan.

Untuk makluman Ahli Yang Berhormat, YWP **bukanlah** salah satu **agensi di bawah kawal selia dan tanggungjawab Kementerian Wilayah Persekutuan**. YWP ditubuhkan di bawah Suruhanjaya Syarikat Malaysia di bawah **Akta Syarikat 2016 [Akta 777]**. Dalam ***Memorandum of Association*** YWP jelas menyatakan bahawa fungsi dan kesesuaian YWP adalah **selari** dengan **hasrat penubuhannya** iaitu untuk **melindungi kebajikan** warga kota Kuala Lumpur, Putrajaya dan Labuan.

**Tuan Yang di-Pertua,**

Perkara ini dinyatakan di **Fasal 3** dalam ***Memorandum of Association*** YWP yang menyatakan bahawa **“Objektif YWP ditubuhkan adalah untuk menerima dan mentadbir dana bagi tujuan membantu**

meningkatkan kualiti kehidupan orang miskin di Wilayah Persekutuan” dengan memberi **capaian** kepada **bantuan kewangan** dan **perkhidmatan asas** yang berkaitan dengan **kebajikan, kesihatan** dan **pendidikan**”.

Justeru itu, bagi **mengelak** wujudnya **konflik kepentingan** YB Menteri Wilayah Persekutuan sebagai Pengerusi YWP, YWP akan hanya **menumpukan** kepada kerja-kerja pendidikan dan **kebajikan** sahaja. Walau bagaimanapun, bagi **usaha mencari dana** bagi **mencapai objektif** YWP, **perniagaan** akan **dijalankan** oleh **anak-anak syarikat** yang **ditubuhkan** di bawah YWP.

Manakala, mengenai **kedudukan Datuk Bandar Kuala Lumpur** sebagai **Ahli Lembaga Pemegang Amanah YWP**, lantikan itu **bukanlah** secara **automatik** dan bagi **mengelakkan konflik kepentingan**, Datuk Bandar Kuala Lumpur **bukanlah Ahli Lembaga Pemegang Amanah YWP** pada hari ini.

Tuan Yang di-Pertua,

Berkaitan **syor** supaya YWP dijadikan sebuah **badan berkanun**, **objektif penubuhan** YWP adalah **jelas** dan **termaktub** di dalam **Memorandum of Association** YWP dan status YWP tidak **perlu diubah** menjadi sebuah **badan berkanun**. Dalam hal ini, **YWP** adalah **tertakluk** kepada **pemantauan** oleh **Suruhanjaya Syarikat Malaysia** melalui pengauditan ke atas penyata kewangan tahunan yang diwajibkan di bawah **Seksyen 248 Akta 777**. Ini bertujuan memastikan penyata kewangan YWP mengandungi **rekod hasil, perbelanjaan** dan **transaksi perniagaan** disimpan dengan teratur dan baik.

Selain itu, YWP juga ditubuhkan selaras dengan **penubuhan yayasan negeri-negeri** lain, termasuk Yayasan Selangor yang juga ditubuhkan di bawah Akta 777 dan **dipengerusikan** oleh **Menteri Besar Selangor**.

Tuan Yang di-Pertua,

Pada masa ini, **Kementerian Kewangan** menerusi **Pekeliling Perbendaharaan PB 3.1 “Garis Panduan Langkah-Langkah Mengoptimumkan Perbelanjaan Kerajaan”** yang sedang berkuat kuasa telah menetapkan bahawa sebarang **penubuhan badan berkanun, syarikat berhad menurut jaminan, atau entiti baharu lain adalah tidak dibenarkan**. Ini bagi **mengelakkan bebanan tambahan** kepada **perbelanjaan Kerajaan** yang akan melibatkan implikasi pertambahan perjawatan dan kewangan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WILSON UGAK ANAK  
KUMBONG [ HULU RAJANG ]**

**TARIKH : 28 OKTOBER 2021 (KHAMIS)**

**SOALAN:**

**Datuk Wilson Ugak Anak Kumbong [ Hulu Rajang ]** minta **PERDANA MENTERI** menyatakan dengan jelas berapa bilangan dan pangkat penjawat awam dari Sarawak yang berkhidmat dalam kumpulan pengurusan tertinggi khusus di peringkat Persekutuan.

**JAWAPAN:**

**DI JAWAB OLEH YB DATUK DR ABD LATIFF AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, berdasarkan status pengisian perjawatan di dalam Human Resource Management Information System (HRMIS), Jabatan Perkhidmatan Awam, setakat 13 Oktober 2021, bilangan pegawai awam kelahiran Sarawak yang sedang berkhidmat di jawatan Kumpulan Pengurusan Tertinggi peringkat Kementerian dan Jabatan Persekutuan adalah seramai 94 orang.

2. Pengagihan mengikut gred Pengurusan Tertinggi adalah seperti berikut :

- a) JUSA A - 6 orang
- b) JUSA B - 14 orang
- c) JUSA C - 74 orang

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN FONG KUI LUN  
[ BUKIT BINTANG ]**

**TARIKH : 28 OKTOBER 2021 (KHAMIS)**

**SOALAN:**

**YB Tuan Fong Kui Lun [Bukit Bintang]** minta **PERDANA MENTERI** menyatakan konsep Keluarga Malaysia beliau adalah meniru konsep Impian Malaysia yang sedang dibangunkan oleh DAP selama ini dan apakah jaminannya bahawa konsep Keluarga Malaysia beliau boleh berjaya dan diterima rakyat.

**JAWAPAN**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Konsep dan falsafah Keluarga Malaysia diperkenalkan oleh YAB Perdana Menteri Malaysia Ke-9 dalam ucapan sulung beliau pada 22 Ogos 2021. Konsep Keluarga Malaysia diambil kerana ia lebih bersifat inklusif di mana ia merentasi sempadan agama, bangsa dan kaum dan merangkumi semua lapisan usia, anak muda sehinggalah ke warga emas.
2. Konsep Keluarga Malaysia ini adalah aspirasi negara yang diilhamkan oleh YAB Perdana Menteri untuk mencapai status negara

maju dan berpendapatan tinggi seperti apa yang dimahukan oleh setiap masyarakat. Konsep Keluarga Malaysia inilah yang akan merealisasikan apa yang saya mahukan, apa yang YB inginkan dan apa yang seluruh rakyat Malaysia mahu dan hasratkan selama ini.

3. Pelbagai program dan inisiatif yang telah dan akan dilaksanakan di bawah payung Keluarga Malaysia. Ini termasuklah Rumah Ikram Keluarga Malaysia, Skuad Keluarga Malaysia, Pakej Peranti Keluarga Malaysia, Pakej Penjagaan COVID-19 Keluarga Malaysia, Keluarga Malaysia Siaga Bencana, Yayasan Kebajikan Siswa Keluarga Malaysia dan Residensi Rumah Keluarga Malaysia. Inilah program dan inisiatif Keluarga Malaysia, di mana setiap kementerian akan memperkenalkan sekurang-kurangnya 1 program dan inisiatif yang bermatlamat membantu mengurangkan kesan ekonomi yang ditanggung rakyat.

4. Pelaksanaan produk-produk Keluarga Malaysia ini akan diukur prestasinya melalui Petunjuk Prestasi Utama dan juga Keberhasilan Kebahagiaan oleh pihak-pihak berkepentingan terutamanya rakyat yang merupakan penerima perkhidmatan produk-produk tersebut.

5. Sehubungan itu, Keluarga Malaysia mempunyai keunikannya yang tersendiri dan tidak meniru mana-mana konsep Impian Malaysia yang sedang dibangunkan oleh DAP.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI HAJI AHMAD BIN HAJI MASLAN  
(PONTIAN)**

**TARIKH : 28 OKTOBER 2021 (KHAMIS)**

**SOALAN**

**DATUK SERI HAJI AHMAD BIN HAJI MASLAN** minta **PERDANA MENTERI** menyatakan adakah Parlimen berhasrat untuk mengadakan Hari Terbuka Kementerian-Kementerian secara berkala di Bangunan Parlimen; menambah bilangan Jawatankuasa Pilihan Khas dan AJKnya diberi elaun dengan jumlah kecil tetapi munasabah dengan kekerapan jumlah mesyuarat yang sesuai.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, Parlimen bersedia membantu Kementerian-Kementerian sedia ada untuk mengadakan Hari Terbuka secara berkala di Bangunan Parlimen atas kesediaan dan permohonan daripada Kementerian-Kementerian terlibat. Seperti mana Yang Berhormat sedia maklum, kini terdapat 10 Jawatankuasa Pilihan Khas iaitu seperti berikut:

- i. Jawatankuasa Pilihan Khas Kebebasan Asasi dan Hak-Hak di Bawah Perlembagaan
- ii. Jawatankuasa Pilihan Khas Kewangan Dan Ekonomi
- iii. Jawatankuasa Pilihan Khas Keselamatan
- iv. Jawatankuasa Pilihan Khas Bagi Agensi-Agensi Di Bawah Jabatan Perdana Menteri
- v. Jawatankuasa Pilihan Khas Pertanian Dan Perdagangan Dalam Negeri
- vi. Jawatankuasa Pilihan Khas Pembangunan Infrastruktur
- vii. Jawatankuasa Pilihan Khas Pendidikan
- viii. Jawatankuasa Pilihan Khas Hal Ehwal Wanita Dan Kanak-Kanak Dan Pembangunan Sosial
- ix. Jawatankuasa Pilihan Khas Kesihatan, Sains dan Inovasi
- x. Jawatankuasa Pilihan Khas Hal Ehwal Antarabangsa

Apa-apa cadangan termasuk untuk menubuhkan Jawatankuasa Pilihan Khas yang baharu dan pemberian elaun kepada Ahli-Ahli Jawatankuasa Pilihan Khas bolehlah dibawa ke Jawatankuasa Dewan untuk diperhalusi dan diputuskan.

Sekian, terima kasih.



**PEMBERITAHUAN PERTANYAANDEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AKMAL NASRULLAH BIN MOHD. NASIR [JOHOR BAHRU]**

**TARIKH : 28 OKTOBER 2021 (KHAMIS)**

**SOALAN :**

**TUAN AKMAL NASRULLAH BIN MOHD. NASIR [ JOHOR BAHRU ]** minta **PERDANA MENTERI** menyatakan sama ada Kerajaan berhasrat untuk membuat penstrukturan semula emolumen dan elaun Menteri dan Timbalan Menteri bagi mengurangkan kos pentadbiran Kerajaan di samping memastikan perbelanjaan pengurusan wang rakyat secara berhemat.

**JAWAPAN:**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS TUGAS KHAS)**

1. Pembayaran gaji yang diberikan kepada Anggota Pentadbiran meliputi Menteri dan Timbalan Menteri Persekutuan adalah sepertimana yang termaktub di bawah **Akta Ahli Parlimen (Saraan) 1980 [Akta 237]**. Buat masa ini, Kerajaan tidak berhasrat untuk membuat penstrukturan semula emolumen Menteri dan Timbalan Menteri.
2. Emolumen yang diterima adalah bersesuaian dengan tugas, bebanan dan tanggungjawab yang dipikul oleh Anggota Pentadbiran. Walau bagaimanapun, cadangan tersebut boleh diberi pertimbangan, sekiranya terdapat keperluan pada masa hadapan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : DATUK SERI SHAMSUL ISKANDAR @ YUSRE  
BIN MOHD AKIM [ HANG TUAH JAYA ]**

**TARIKH : 28 OKTOBER 2021 (KHAMIS)**

**SOALAN**

**DATUK SERI SHAMSUL ISKANDAR @ YUSRE BIN MOHD AKIN  
[ HANG TUAH JAYA ]** minta **MENTERI ALAM SEKITAR DAN AIR** menyatakan bilakah Rang Undang-Undang Perubahan Iklim akan dapat dibentangkan dan apakah terdapat usaha untuk membangunkan sistem amaran cuaca yang lebih sistematik dan bersepadu.

**JAWAPAN**

Tuan Yang Di-Pertua,

1. Untuk makluman Ahli Yang Berhormat, Kementerian Alam Sekitar dan Air sedang membangunkan Rang Undang-Undang Perubahan Iklim negara secara berfasa. Fasa awal adalah melibatkan pembangunan kerangka undang-undang perubahan iklim yang dijangka akan dimuktamadkan pada awal tahun 2022. Kerangka undang-undang tersebut akan menjadi asas kepada pembangunan Rang Undang-Undang atau Akta Perubahan Iklim yang dijangka akan dimuktamadkan pada tahun 2025.

Tuan Yang Di-Pertua,

2. Kementerian Alam Sekitar dan Air melalui agensi pelaksana Jabatan Meteorologi Malaysia (MET Malaysia) berperanan untuk **membekalkan maklumat mengenai ramalan cuaca dan penyebaran amaran cuaca kepada semua stakeholder**. Sehubungan dengan itu, MET Malaysia telah mula membangunkan sistem amaran awal cuaca pada tahun 2002. Sejak itu, sistem ini telah ditambahbaik secara berterusan agar ia lebih sistematik dan bersepadu dengan meningkatkan keupayaan sistem rangkaian pencerapan, pemprosesan data dan penyebaran maklumat. Antara usaha-usaha yang telah dan sedang diambil oleh MET Malaysia bagi memperkasakan sistem amaran awal cuaca sedia ada ialah menambah rangkaian radar cuaca, menambahbaik stesen pencerapan permukaan, mempertingkatkan model ramalan cuaca berangka dan menambahbaik sistem penyampaian maklumat.

3. Untuk makluman Ahli Yang Berhormat, di bawah Rancangan Malaysia Kesebelas (RMKe-11) dan Rancangan Malaysia Keduabelas (RMKe-12), MET Malaysia sedang memasang lapan buah stesen radar baharu iaitu di Perak, Kelantan, Terengganu, Pahang, Sabah dan Sarawak. Pembinaan lapan buah radar ini adalah sebagai tambahan kepada 11 buah stesen radar sedia ada dan dijangka siap sepenuhnya pada tahun 2022. Dengan tambahan radar baharu ini, pemantauan hujan lebat dapat dilakukan dengan lebih teliti dan menyeluruh.

Tuan Yang di-Pertua,

4. Usaha kedua ialah MET Malaysia kini sedang menaiktaraf 60 stesen pencerapan permukaan kepada Stesen Cuaca Automatik. Ia adalah sebagai tambahan kepada 205 stesen sedia ada dan projek ini dijangka akan siap pada tahun 2022. Melalui usaha ini, MET Malaysia dapat memantau keadaan cuaca dengan lebih terperinci pada masa sebenar.

5. Usaha ketiga pula ialah mempertingkatkan model ramalan cuaca berangka. **MET Malaysia telah meningkatkan keupayaan model cuaca dengan mengadaptasi teknologi Sistem Komputer Berprestasi**

**Tinggi (*High Performance Computing (HPC)*)** mulai pertengahan tahun 2017. Produk-produk model cuaca yang dijanakan oleh Sistem HPC ini membolehkan pegawai-pegawai meteorologi menjangkakan risiko bencana cuaca tujuh hari lebih awal berbanding dahulu hanya tiga hari. Ia juga membekalkan perincian bagi kawasan dilanda bencana dengan resolusi satu kilometer persegi berbanding 16 kilometer persegi sebelum ini.

6. Dalam meningkatkan keupayaan pengeluaran amaran ribut petir, **MET Malaysia telah membangunkan sistem pemantauan dan ramalan fenomena ribut petir dan hujan lebat iaitu *Radar Integrated Nowcasting System (RaINS)*** yang menggunakan teknologi termaju rangkaian radar cuaca dan model ramalan berangka atmosfera janaan Sistem HPC. RaINS berupaya menghasilkan unjuran pergerakan dan intensiti hujan untuk setiap 10 minit sehingga tiga jam ke hadapan.

Tuan Yang di-Pertua,

7. Usaha keempat ialah menambahbaik sistem penyampaian maklumat. Seiring dengan perkembangan semasa agar penyampaian perkhidmatan dapat memenuhi kehendak rakyat, MET Malaysia telah membangunkan aplikasi myCuaca yang dapat memberikan maklumat cuaca dan gempa bumi untuk diakses pada bila-bila masa oleh orang ramai. MET Malaysia turut melaksanakan RakanMET iaitu medium interaksi dua hala antara MET Malaysia dan orang awam bagi perkongsian maklumat sahih mengenai perkembangan cuaca semasa di Negara.

8. Di bawah RMKe-12, MET Malaysia juga akan menambahbaik sistem penyampaian maklumat bencana berkaitan cuaca, gempa bumi dan tsunami yang mesra pengguna dan *real time* sejajar dengan perubahan teknologi terkini.

Sekian, terima kasih.

**PEMBERITAHUAN PERTANYAAN LISAN DEWAN  
RAKYAT MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI DR. MUJAHID BIN YUSOF RAWA  
[PARIT BUNTAR]**

**TARIKH : 28 OKTOBER 2021 (KHAMIS)**

**SOALAN**

Minta **PERDANA MENTERI** menyatakan langkah yang diambil untuk membantu sekolah-sekolah tahfiz dan agama akibat pandemik.

**JAWAPAN**

**YB SENATOR TUAN HAJI IDRIS BIN HAJI AHMAD,  
MENTERI DI JABATAN PERDANA MENTERI  
(HAL EHWAL AGAMA)**

Tuan Yang di-Pertua,

1. Pandemik Covid-19 yang melanda dunia hari ini telah memberi impak yang besar kepada semua sektor termasuk sektor pendidikan. Justeru, Kerajaan telah memperkenalkan pelbagai inisiatif bagi membantu kelangsungan pengoperasian institusi pendidikan di negara ini termasuk institusi tahfiz swasta yang berdaftar dengan Pihak Berkuasa Agama Negeri. Antaranya dengan memperkenalkan Pengajaran dan Pembelajaran di Rumah (PdPR) bagi membolehkan institusi berkenaan terus dapat beroperasi dalam norma baharu. Sebelum itu, ingin saya jelaskan di dewan yang mulia ini bahawa berdasarkan maklumat yang disahkan oleh Pihak Berkuasa Agama Negeri, hakikatnya penutupan institusi tahfiz swasta berdaftar adalah hanya bersifat sementara bagi mematuhi arahan Kerajaan supaya rantai jangkitan wabak Covid-19 dapat diputuskan. Namun begitu,

tidak dinafikan terdapat institusi yang tidak berdaftar yang berhadapan dengan kemerosotan sumber kewangan impak pandemik ini.

2. Pada tahun 2020, sebanyak RM100,000,000.00 turut diperuntukkan bagi tujuan yang sama. Daripada jumlah tersebut, sebanyak RM18,596,520.00 telah diperuntukkan di bawah Bantuan Khas Impak Pandemik Covid-19 secara *one-off* merangkumi bantuan sara hidup berjumlah RM800.00 seorang kepada guru-guru warganegara di institusi pendidikan Islam berdaftar termasuk guru di institusi tahfiz dan bantuan pengurusan operasi dengan peruntukan RM10.00 per murid warganegara bagi tujuan pengurusan institusi berkenaan. Peruntukan pada tahun 2020 telah memberi manfaat kepada 1,667 buah tahfiz dengan peruntukan sebanyak RM39,963,810.00 dan 339 buah pondok dengan jumlah peruntukan sebanyak RM11,014,030.00.

3. Pada tahun 2021, Kerajaan sekali lagi menyediakan peruntukan sebanyak RM100,000,000.00 secara *one-off* bagi tujuan selenggara dan naik taraf Institusi Pendidikan Islam di bawah penyelarasan Lembaga Penasihat Penyelarasan Pelajaran dan Pendidikan Agama Islam (LEPAI) merangkumi Sekolah Agama, institusi tahfiz dan pondok. Sehingga Ogos 2021, sebanyak RM60,000,000.00 telah disalurkan kepada 1,066 buah institusi yang layak dan daripada jumlah tersebut sebanyak RM22,257,100.00 telah disalurkan kepada 413 buah institusi tahfiz di negeri-negeri seluruh negara. Kerajaan amat prihatin untuk membantu pengurusan dan pengoperasian institusi tahfiz yang terjejas. Untuk tujuan tersebut, kerajaan telah bersetuju untuk mengagihkan sebahagian daripada baki RM40,000,000.00 yang telah diterima oleh JAKIM pada 4 Oktober 2021.

4. Bagi bantuan jangka panjang, Kerajaan turut merancang untuk memberi kemahiran Tahfiz Tvet kepada pengusaha dan murid tahfiz bagi membolehkan mereka menjana pendapatan sendiri dan tidak terlalu bergantung kepada bantuan dan sumbangan kerajaan serta masyarakat, dalam memastikan institusi tahfiz di bawah kelolaan mereka terus dapat beroperasi. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 28 OKTOBER 2021 (KHAMIS)**

**SOALAN**

**TUAN WILLIAM LEONG JEE KEEN [SELAYANG]** minta **PERDANA MENTERI** menyatakan langkah-langkah yang diambil untuk memastikan penyiasatan terhadap dakwaan salah guna kuasa dan penyelewengan oleh pegawai pegawai SPRM dijalankan berasingan dan langkah-langkah yang diambil untuk meningkatkan integriti pegawai-pegawai SPRM.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, SPRM komited dalam usaha untuk memastikan integriti yang tinggi dalam kalangan warganya. Antara usaha – usaha yang telah dilakukan oleh SPRM ialah seperti berikut:

1) Penubuhan Jawatankuasa Aduan (JKA) di bawah Seksyen 15 Akta SPRM 2009 (Akta 694). JKA berperanan untuk mengenal pasti apa-apa kelemahan dalam tatacara kerja Suruhanjaya yang mungkin menimbulkan aduan dan menggemukakan syor untuk penambahbaikan.

JKA juga memantau pengendalian oleh Suruhanjaya terhadap aduan mengenai salah laku yang tidak bersifat jenayah terhadap pegawai-pegawai Suruhanjaya;

2) Penggubalan Kod Etika dan Tatakelakuan untuk menggalakkan akauntabiliti dan memantapkan integriti dalam kalangan warga SPRM ke arah pencapaian prestasi kerja yang cemerlang. Kod Etika dan Tatakelakuan ini menjelaskan norma kelakuan dan panduan tingkah laku yang perlu dipatuhi oleh setiap warga SPRM bagi memastikan segala tindakan adalah selaras dengan peruntukan undang-undang, peraturan dan arahan yang berkuat kuasa.

3) SPRM juga mengambil tindakan tatatertib terhadap mana-mana warganya yang melanggar Peraturan-Peraturan Pegawai Awam (Kelakuan dan Tatatertib) 1993 bagi kes-kes yang tidak bersifat jenayah.

Bagi memelihara integriti warga SPRM, tindakan 'Integriti Testing' seperti ujian air kencing bagi pengesanan penggunaan bahan terlarang sentiasa diadakan secara berkala dan mengejut di semua SPRM Bahagian dan Negeri. Selain daripada itu, pemeriksaan pematuhan terhadap arahan-arahan dalaman SPRM juga diadakan secara berkala bagi memastikan warga SPRM menjalankan tugas mengikut prosedur yang telah ditetapkan. Laporan tindakan ini akan dibentangkan di dalam Mesyuarat Jawatankuasa Aduan (JKA)

Untuk makluman Yang Berhormat jua, apabila sesuatu Kertas Siasatan (KS) telah lengkap SPRM akan menggemukakan KS kepada Pejabat Peguam Negara untuk penelitian dan keputusan. SPRM tidak mempunyai kuasa untuk menetapkan sesuatu perbicaraan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN HASSAN BIN ABDUL KARIM  
[PASIR GUDANG]**

**TARIKH : 28 OKTOBER 2021 (KHAMIS)**

**SOALAN**

**TUAN HASSAN BIN ABDUL KARIM [ PASIR GUDANG ]** minta **PERDANA MENTERI** menyatakan adakah Kerajaan berhasrat demi meningkatkan Integriti Suruhanjaya Pencegahan Rasuah supaya SPRM tersebut diletakkan di bawah Parlimen dan tidak lagi di bawah kuasa Perdana Menteri.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) secara keseluruhannya tidak diletakkan di bawah mana-mana kuasa pihak tertentu. SPRM menjunjung prinsip pengasingan kuasa di mana SPRM bertanggungjawab untuk mengesan dan menyiasat kesalahan di bawah Akta SPRM 2009 dan Seksyen 58 seterusnya menyatakan dengan jelas bahawa pendakwaan kes di bawah akta ini tidak boleh dijalankan kecuali oleh atau dengan keizinan Pendakwa Raya.

Selaras dengan penubuhan SPRM, lima mekanisme telah diwujudkan sebagai *check and balance* terhadap perjalanan SPRM dalam melaksanakan fungsi dan peranannya. Lima mekanisme tersebut adalah Lembaga Penasihat Pencegahan Rasuah (LPPR), Jawatankuasa Khas Mengenai Rasuah (JKMR), Jawatankuasa Aduan (JKA), Panel Penilaian Operasi (PPO) dan Panel Perundingan dan Pencegahan Rasuah (PPPR). Kelima-lima badan khas ini diwujudkan bertujuan untuk memastikan ketelusan dan akauntabiliti dalam keseluruhan perjalanan SPRM dan membantu memenuhi harapan masyarakat terhadap kebebasan, kecekapan, keberkesanan, ketelusan dan akauntabiliti Suruhanjaya dalam pelaksanaan kewajipan undang-undang yang telah ditetapkan. Lebih penting lagi, perjalanan SPRM akan menjadi lebih telus dan terbuka untuk diawasi oleh pihak yang berkenaan untuk membendung sebarang penyalahgunaan kuasa atau pengaruh keterlaluan oleh pihak Eksekutif.

Menerusi lima mekanisme ini, SPRM merupakan satu-satunya agensi di Malaysia yang memberi akses kepada ahli-ahli badan bebas yang mewakili orang awam, terdiri daripada bekas pegawai-pegawai kanan kerajaan, ahli-ahli politik (kerajaan dan pembangkang), golongan profesional dari kalangan ahli perniagaan dan sektor korporat, ahli akademik, peguam dan individu-individu yang disegani untuk bersuara dalam menentukan rentak serta fungsi SPRM. Laporan Tahunan SPRM juga dibentangkan di Parlimen bersama dengan Laporan Lembaga Penasihat dan Jawatankuasa Khas untuk ditatap dan diteliti oleh semua pihak. Bukan itu sahaja, ahli-ahli parlimen boleh mengemukakan sebarang pertanyaan berhubung ketiga-tiga laporan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK IGNATIUS DARELL LEIKING  
[PENAMPANG]**

**TARIKH : 28 OKTOBER 2021 (KHAMIS)**

**SOALAN**

**DATUK IGNATIUS DARELL LEIKING [PENAMPANG]** minta **PERDANA MENTERI** menyatakan tindakan segera Kerajaan menangani masalah kemiskinan rakyat Sabah kerana menurut Laporan Pendapatan Isi Rumah Dan Kejadian Kemiskinan Malaysia 2020 oleh Jabatan Statistik, Sabah mencatatkan kadar 25.3% kemiskinan mutlak yang tertinggi di Malaysia dan Buku RMK-12 menunjukkan 8 dari 10 daerah termiskin di Malaysia adalah di Sabah.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Ahli Yang Berhormat Penampang, Rancangan Malaysia Kedua Belas (RMKe-12), 2021-2025 akan memberi tumpuan kepada memperkukuh pembangunan sosioekonomi di Sabah dan Sarawak agar jurang pembangunan dengan negeri-negeri lain dapat dikurangkan. Keutamaan akan diberi untuk memantapkan penyediaan infrastruktur, mengoptimumkan potensi ekonomi, menambah baik akses kepada perkhidmatan sosial, mempertingkatkan pembangunan inklusif dan memperkukuh kerjasama antara agensi Persekutuan dan kerajaan negeri.
2. Di samping itu, Kerajaan juga akan mengoptimumkan potensi ekonomi di Sabah terutamanya dalam memperkukuh akses pembangunan Perusahaan Mikro, Kecil dan Sederhana (PMKS) kepada pembiayaan, memperkukuhkan aktiviti berasaskan sumber, memudahkan cara perniagaan dan meningkatkan akses pasaran PMKS. Pelaksanaan langkah ini dijangka dapat mengurangkan jurang pembangunan sosioekonomi antara negeri Sabah, Sarawak dan Semenanjung Malaysia serta meningkatkan kesejahteraan rakyat.
3. Di bawah Koridor Ekonomi Wilayah Sabah, Pihak Berkuasa Pembangunan dan Pelaburan Sabah (SEDIA) akan memberi tumpuan kepada enam bidang utama iaitu minyak, gas dan tenaga, pelancongan, minyak sawit, pembuatan dan logistik, pertanian serta pendidikan. Penglibatan komuniti setempat akan digalakkan bagi mempromosi aktiviti pelancongan di Sabah. Pembangunan sektor pembuatan dan perkhidmatan logistik akan memberi tumpuan kepada aktiviti hiliran yang mempunyai nilai tambah yang tinggi. Rangka Tindakan SDC, 2008-2025 yang sedang disemak semula oleh SEDIA akan dijangka dengan dasar dan strategi pada peringkat nasional dan negeri. Semakan semula yang akan dimuktamadkan pada tahun 2021 ini akan menyediakan pendekatan pembangunan yang lebih strategik, terutama dalam menarik pelaburan

## SOALAN NO : 31

berkualiti bagi mewujudkan peluang pekerjaan dan keusahawanan di wilayah ini.

4. Usaha akan diperkukuh dalam pembangunan sosioekonomi di Sabah, termasuk menangani kemiskinan dan mempelbagaikan sumber pendapatan serta meningkatkan kesejahteraan rakyat bagi Anak Negeri Sabah khususnya di daerah termiskin. Sumber pendapatan isi rumah miskin akan ditingkat dan dipelbagaikan melalui penglibatan dalam aktiviti ekonomi yang mempunyai nilai ditambah yang tinggi, pembangunan modal insan dan keusahawanan. Sumber semula jadi dan budaya tempatan akan dimanfaatkan dalam mengkomersialkan produk tempatan yang mempunyai nilai ditambah yang tinggi termasuk industri pertanian, akuakultur, ekopelancongan serta menceburi seni dan kraf.

5. Secara khususnya, Program Khas Anak Negeri Sabah dijangka dapat meningkatkan kebolehpasaran dan pendapatan, menggalakkan keusahawanan serta memudah cara pembangunan tanah adat (NCR). Program dan projek yang dirancang akan memberi fokus kepada pembangunan masyarakat Bumiputera di Sabah terutamanya berkaitan pendidikan, keusahawanan, hak tanah dan mahkamah adat.

6. Bahagian Hal Ehwal Sabah dan Sarawak, Jabatan Perdana Menteri akan memainkan peranan bagi memperkukuh kerjasama antara Agensi Persekutuan dan Kerajaan Negeri untuk memastikan penyampaian perkhidmatan kepada kumpulan sasar. Kerajaan yakin melalui pendekatan keseluruhan negara (*whole of nation approach*) antara Kerajaan Persekutuan dan Kerajaan Negeri, maka sektor swasta, pertubuhan berasaskan komuniti dan masyarakat, usaha pembasmian kemiskinan terutama kemiskinan tegar akan dimantapkan untuk memastikan tiada siapa Keluarga Malaysia di Sabah yang tertinggal.

Sekian, terima kasih.

**PEMBERITAHUAN PERTANYAAN LISAN**  
**MESYUARAT KEDUA, PENGGAL KEEMPAT,**  
**PARLIMEN KE-14 DEWAN RAKYAT**

**PERTANYAAN : LISAN**

**DARIPADA : DATUK SERI PANGLIMA MADIUS TANGAU [ TUARAN ]**

**TARIKH : 28 OKTOBER 2021 (KHAMIS)**

**SOALAN**

**DATUK SERI PANGLIMA MADIUS TANGAU [ TUARAN ]** minta **PERDANA MENTERI** menyatakan apakah tindakan bersungguh-sungguh untuk melaksanakan MA63 sepenuhnya setelah MoU antara Kerajaan dengan Pakatan Harapan dan Ahli-ahli Parlimen dilaksanakan yang terkait dengan MA63.

**JAWAPAN: YB DATO HAJJAH HANIFAH HAJAR TAIB**  
**TIMBALAN MENTERI DI JABATAN PERDANA MENTERI**  
**(HAL EHWAL SABAH DAN SARAWAK)**

1. Untuk makluman Ahli Yang Berhormat, secara keseluruhan, semenjak diluluskan penubuhannya oleh Jemaah Menteri pada 9 September 2020, Majlis Khas Mengenai Perjanjian Malaysia 1963 (**Majlis Khas MA63**) telah bermesyuarat sebanyak 3 kali iaitu pada **2 Disember 2020, 13 April 2021 dan 18 Oktober 2021**.

2. Seperti mana Ahli Yang Berhormat sedia maklum, keputusan-keputusan yang telah dicapai di bawah Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKKMA63) sebelum ini merupakan keputusan dasar yang mana masih memerlukan tindakan lanjut sebelum dapat dilaksanakan sepenuhnya. Walau bagaimanapun, sukacita saya ingin memaklumkan bahawa terdapat

beberapa perkara telah selesai dibincangkan dan telah dibawa untuk perakuan Majlis Khas 1963 untuk dilaksanakan seperti berikut:

- (i) Penyerahan Kuasa Kawal Selia Pengedaran Gas (*Liquefied Petroleum Gas* – LPG) Kepada Kerajaan Negeri Sarawak telah selesai dilaksanakan sepenuhnya pada 1 Jun 2021 dan telah dirasmikan oleh YAB Ketua Menteri Sarawak pada 9 September 2021;
- (ii) Kuasa Pentadbiran ke Atas Pulau Sipadan dan Pulau Ligitan Kepada Kerajaan Negeri Sabah, Majlis Khas MA63 bersetuju supaya Perintah Kawasan Larangan dan Tempat Larangan bagi kedua-dua pulau dibatalkan namun tanggungjawab berhubung keselamatan adalah masih di bawah Kerajaan Persekutuan;
- (iii) Cadangan Rang Undang-Undang Perlembagan Persekutuan (Pindaan) 2021 pula telah diperakukan oleh Majlis Khas MA63 pada 18 Oktober 2021 dan telah dibawa kepada Jemaah Menteri pada 21 Oktober 2021. Bacaan Kali Pertama dan Bacaan Kali Kedua RUU adalah pada sidang mesyuarat Parlimen kali ini.
- (iv) *Empowerment* Pelesenan Laut Dalam Sabah turut diperakukan oleh Majlis Khas dalam mesyuarat yang sama. Pelaksanaan (dengan izin) *empowerment* Pelesenan Perikanan Laut Dalam Sabah dijangka akan mula dilaksanakan pada Disember 2021. Majlis Khas juga bersetuju supaya kuasa yang sama juga dipanjangkan kepada Pengarah Jabatan Perikanan Laut Sarawak.

3. Selain itu, terdapat juga isu-isu lain yang sedang dibincangkan di peringkat Jawatankuasa Kerja yang ditubuhkan di bawah Majlis Khas MA63 iaitu seperti:

- (i) Semakan semula berhubung isu-isu pentadbiran badan kehakiman di Sabah dan Sarawak di bawah Jawatankuasa Kerja Rakan Sekutu;
- (ii) Perkara berkaitan keselamatan negeri seperti isu sempadan negeri Sarawak, isu imigresen seperti IMM13, Burung-Burung, Kad Banci dan PATI di negeri Sabah di bawah Jawatankuasa Kerja Keselamatan Negeri Sabah dan Sarawak;
- (iii) Keperluan infrastruktur asas di negeri Sabah dan Sarawak seperti jalan raya, air/elektrik, kesihatan, pendidikan, digital, kemiskinan dan perumahan rakyat di bawah Jawatankuasa Kerja Sosioekonomi; dan
- (iv) Semakan Semula Pemberian Khas di bawah Perkara 112D Perlembagaan Persekutuan.

4. Kerajaan Persekutuan juga berharap supaya perkara ini dapat dimuktamadkan dengan kadar segera.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS 2021**

**PERTANYAAN : LISAN**

**DARIPADA : PUAN JUNE LEOW HSIAD HUI  
[HULU SELANGOR]**

**TARIKH : 28 OKTOBER 2021 (KHAMIS)**

**SOALAN**

**PUAN JUNE LEOW HSIAD HUI [HULU SELANGOR]** minta **PERDANA MENTERI** menyatakan apakah perancangan Kerajaan bagi Perumahan Generasi Baharu FELDA sepanjang RMK-12 dan mengapa ada permohonan tanah rezab FELDA yang tidak diluluskan untuk diberikan kepada generasi Kedua FELDA bagi mendirikan kediaman mereka.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. YAB Perdana Menteri dalam pembentangan Rancangan Malaysia ke-12 di Dewan Rakyat pada 27 September 2021 antara lain telah memaklumkan bahawa isu perumahan generasi kedua FELDA akan ditangani dengan memperkenalkan model pembangunan perumahan berasaskan konsep bina sendiri. Melalui model ini, generasi kedua akan ditawarkan lot-lot kediaman dan seterusnya dibina sendiri berdasarkan reka bentuk standard yang disediakan.
2. Bagi melaksanakan program tersebut, FELDA telah mengenal pasti 5,000 lot kediaman di 48 tanah rancangan FELDA seluruh negara. FELDA akan mula mengadakan rundingan dengan Kerajaan-Kerajaan Negeri yang terlibat bagi pemberimilikan tanah terbabit.
3. Sementara itu, pembentukan kawasan penempatan di sebuah rancangan FELDA dibuat melalui pengisytiharan warta di bawah Seksyen 4, 5, & 6 Akta Tanah (Kawasan Penempatan Berkelompok) 1960. Sehubungan itu, sebarang permohonan tanah rezab FELDA untuk diberikan kepada generasi kedua FELDA bagi mendirikan kediaman perlu melalui proses pemberimilikan oleh Kerajaan Negeri bagi memastikan kawalan terhadap penggunaan tanah.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN WILLIAM LEONG JEE KEEN  
[SELAYANG]**

**TARIKH : 28 OKTOBER 2021 (KHAMIS)**

**SOALAN:**

**Tuan William Leong Jee Keen [Selayang]** minta **PERDANA MENTERI** menyatakan langkah-langkah yang diambil untuk menangani naungan politik dalam perkhidmatan awam dan untuk memastikan promosi berdasarkan merit.

**JAWAPAN**

**DIJAWAB OLEH YB DATUK ABD LATIFF AHMAD  
MENTERI DI JABATAN PERDANA MENTERI  
(TUGAS TUGAS KHAS)**

Tuan Yang di-Pertua,

1. Kenaikan pangkat seseorang pegawai awam dilaksanakan berasaskan merit. Dalam mempertimbangkan merit seseorang pegawai, elemen atau pengaruh politik sememangnya tidak diambil kira oleh sesebuah Lembaga Kenaikan Pangkat. Antara perkara yang dinilai adalah seperti berikut:

- (a) kecekapan dan prestasi kerja;
- (b) kelayakan, pengetahuan, kemahiran dan pengalaman;

- (c) sifat-sifat peribadi, termasuk kesesuaiannya dengan jawatan kenaikan pangkat itu, potensi dan kepimpinan; dan
- (d) kegiatan luar dan sumbangan pegawai kepada negara dan masyarakat.

2. Selain itu, seseorang pegawai juga hanya boleh dipertimbangkan bagi kenaikan pangkat jika pegawai tersebut telah mematuhi semua syarat yang dinyatakan dalam skim perkhidmatannya dan terdapat kekosongan dalam jawatan kenaikan pangkat itu.

3. Pengaruh politik terhadap urusan kenaikan pangkat seseorang pegawai awam sebenarnya sudah dapat dielakkan melalui pelaksanaan urusan berkenaan berdasarkan peraturan-peraturan sedia ada yang berkuatkuasa termasuklah Peraturan-Peraturan Pegawai Awam (Pelantikan, Kenaikan Pangkat dan Penamatan Perkhidmatan) 2012 [P.U.(A) 1/2012], Peraturan-Peraturan Lembaga Kenaikan Pangkat Perkhidmatan Awam, 2010 [P.U.(A) 75/2010] dan Pekeliling Perkhidmatan Bilangan 7 Tahun 2010 - Panduan Pengurusan Pemangkuan Dan Kenaikan Pangkat Dalam Perkhidmatan Awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN CHAN FOONG HIN  
(KOTA KINABALU)**

**TARIKH : 28 OKTOBER 2021 (KHAMIS)**

**SOALAN**

**TUAN CHAN FOONG HIN [ KOTA KINABALU ]** minta **PERDANA MENTERI** menyatakan adakah Laporan Jawatankuasa Kira-Kira Wang Negara (PAC) akan diberikan ruang dan peluang untuk dibahaskan dalam sidang Dewan Rakyat agar setiap inti pati laporan itu boleh diperhalusi oleh semua Ahli Parlimen, memupuk amalan ketelusan, dan mendukung usaha mentransformasikan Dewan Rakyat.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Laporan Jawatankuasa Kira-Kira Wang Negara (PAC) boleh dibahaskan dalam Majlis Mesyuarat Dewan Rakyat melalui prosedur-prosedur yang telah ditetapkan di bawah Peraturan-peraturan Majlis Mesyuarat Dewan Rakyat dan ia boleh dibawa oleh mana-mana Ahli-ahli Yang Berhormat.

Dalam pada itu, Ahli-ahli Yang Berhormat juga boleh membangkitkan perkara-perkara yang dibangkitkan dalam laporan-laporan PAC melalui pertanyaan-pertanyaan kepada Menteri dan perbahasan di Dewan Rakyat seperti perbahasan Belanjawan Tahunan dan urusan-urusan lain yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB TUAN WONG KAH WOH  
[ IPOH TIMUR ]**

**TARIKH : 28 OKTOBER 2021 (KHAMIS)**

**SOALAN:**

Minta **PERDANA MENTERI** menyatakan jumlah kutipan Tabung COVID-19 Agensi Pengurusan Bencana Negara (NADMA) dan penggunaannya setakat kini.

**JAWAPAN:**

**DIJAWAB OLEH YB DATUK DR ABD LATIFF AHMAD  
MENTERI DI JABATAN PERDANA MENTERI  
(TUGAS TUGAS KHAS)**

Tuan Yang Dipertua,

1. Sehingga 15 Oktober 2021, Tabung COVID-19 NADMA telah menerima sumbangan sebanyak RM139.314 juta. Daripada jumlah tersebut, sebanyak RM34.63 juta telah disalurkan kepada Yayasan Kebajikan Negara bagi bantuan bakul makanan, RM30.07 juta bagi bantuan khas pengurusan kematian COVID-19 dan RM25.48 juta bagi bantuan khas kehilangan pendapatan. Sehingga kini, tabung berkenaan telah memanfaatkan seramai 1,146,050 orang penerima.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS 2021**

**PERTANYAAN : LISAN**

**DARIPADA : TUAN CHONG CHIENG JEN [ STAMPIN ]**

**TARIKH : 28 OKTOBER 2021 (KHAMIS)**

**SOALAN**

**TUAN CHONG CHIENG JEN [ STAMPIN ]** minta **PERDANA MENTERI** menyatakan adakah Dasar Ekuiti Bumi yang mensyaratkan pemilikan sesetengah ekuiti hanya untuk Bumiputera akan menghadkan pasaran ekuiti bumi berkenaan dan memberi peluang kepada Bumiputera yang kaya untuk menekan turun harga saham berkenaan dan Bumiputera yang lebih miskin akan dieksploitasikan.



**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Dasar Ekonomi Baru (DEB) telah mensasarkan pencapaian pemilikan ekuiti korporat Bumiputera adalah sekurang-kurangnya 30%. Sasaran ini diteruskan dalam Model Baru Ekonomi dan seterusnya dalam tempoh RMKe-12. Walau bagaimanapun, pemilikan ekuiti korporat Bumiputera masih belum tercapai setakat ini.

2. Seperti yang telah diumumkan dalam pembentangan RMKe-12, pemilikan ekuiti sektor korporat berasaskan nilai pasaran pada tahun 2019 bagi pegangan Bumiputera adalah 17.2%, bukan Bumiputera 25%, asing 45.5% dan nomini 12.3%.

3. Antara faktor yang menyebabkan sasaran sekurang-kurangnya 30% pemilikan ekuiti korporat Bumiputera ini masih belum dapat dicapai adalah seperti berikut:

- liberalisasi beberapa sektor ekonomi termasuk kelonggaran dalam syarat 30% pemilikan ekuiti Bumiputera bagi sektor pembuatan di bawah Akta Penyelarasan Perindustrian 1975;
- penjualan ekuiti kepada bukan Bumiputera dan kepentingan asing; dan
- beberapa institusi Bumiputera yang dimandatkan oleh Kerajaan telah memaksimumkan objektif keuntungan komersial dan kurang memberi penekanan kepada agenda Bumiputera.

Tuan Yang di-Pertua,

4. Dalam memastikan pemilikan ekuiti Bumiputera agar terus mampan, Kerajaan telah memperkenalkan strategi dan inisiatif pemilikan ekuiti sektor korporat Bumiputera termasuk untuk membantu golongan Bumiputera di Sabah dan Sarawak seperti berikut:

- Mengkaji semula strategi pelaburan antaranya, melalui cadangan untuk memperkenalkan kerangka jaringan keselamatan ekuiti;
- Mempertingkatkan literasi pelaburan antaranya, melalui kerjasama antara institusi Bumiputera seperti Permodalan Nasional Berhad (PNB), MARA dan EKUINAS dengan Suruhanjaya Sekuriti dan Bursa Malaysia; dan
- Memantapkan peranan syarikat milik Kerajaan/*State Owned Enterprise* (SOE) sebagai pemboleh daya bagi pemilikan ekuiti Bumiputera. Ini akan dilaksanakan antaranya, dengan memudahkan cara penyenaraian lebih banyak syarikat awam tersenarai (PLC) Bumiputera dengan menambah baik program sedia ada.

5. Berhubung cadangan kerangka jaringan keselamatan ekuiti yang akan diperkenalkan, cadangan ini tidak akan mengambil hak kepentingan kaum lain, tidak akan mengehadkan pasaran ekuiti Bumiputera dan tidak akan membuka peluang untuk dieksploitasi oleh Bumiputera lain. Sebaliknya, ia adalah untuk memastikan sebarang penjualan saham dan syarikat Bumiputera masih kekal dalam pegangan Bumiputera. Penentuan harga sesuatu saham juga ditentukan oleh permintaan dan penawaran di pasaran terbuka.

6. Sehubungan itu, usaha akan terus dipergiat untuk memastikan pemilikan ekuiti korporat Bumiputera terus mampan bagi memastikan pemilikan ekuiti korporat Bumiputera terus mampan melalui strategi dan inisiatif yang telah dirangka dalam RMKe-12.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS 2021**

**PERTANYAAN : LISAN**

**DARIPADA : TUAN TAN KOK WAI  
[CHERAS]**

**TARIKH : 28 OKTOBER 2021 (KHAMIS)**

**SOALAN**

**TUAN TAN KOK WAI [CHERAS]** minta **PERDANA MENTERI** menyatakan keadaan ketidaksamaan, ketidakseimbangan, dan ketidakadilan ekonomi dan masalah sosial yang dihadapi oleh rakyat Malaysia semasa pandemik COVID-19 dan bagaimana masalah-masalah ini dapat diselesaikan.

**JAWAPAN**

**DIJAWAB OLEH YB DATO' SRI MUSTAPA BIN MOHAMED  
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Untuk makluman Yang Berhormat, pandemik COVID-19 memberi kesan sosioekonomi dan kesejahteraan kepada rakyat Keluarga Malaysia. Kadar kemiskinan mutlak meningkat daripada 5.6 peratus (405.4 ribu isi rumah) pada tahun 2019 kepada 8.4 peratus (639.8 ribu isi rumah) pada tahun 2020. Manakala, kadar kemiskinan tegar juga meningkat dari 0.4 peratus (27.2 ribu isi rumah) kepada 1.0 peratus (78 ribu isi rumah). Pekali Gini meningkat dari 0.407 kepada 0.411, menunjukkan ketidaksamarataan antara isi rumah semakin melebar.

2. Kadar pengangguran meningkat dari 3.3 peratus (504.3 ribu isi rumah) pada tahun 2019 kepada 4.5 peratus (711.0 ribu isi rumah) pada tahun 2020. Berdasarkan kepada Laporan Survei Gaji & Upah 2020, purata gaji dan upah menyusut kepada RM2,933 pada tahun 2020 daripada RM3,224 pada tahun 2019 sebanyak 9.0 peratus. Pendapatan isi rumah kasar bulanan penengah menurun kepada RM5,873 pada tahun 2020 dari RM5,209 pada tahun 2019 sebanyak 11.3 peratus. Pandemik COVID-19 bukan sahaja menjejaskan kumpulan pendapatan isi rumah malah isi rumah M40 dan T20. Sekitar 20 peratus (kira-kira 600 ribu isi rumah) dari kumpulan M40 beralih ke pendapatan di bawah B40.

3. Di samping itu, desakan ekonomi dan perubahan mendadak norma baharu ketika pandemik menjadi punca pelbagai masalah sosial dalam tempoh tersebut. Beberapa masalah sosial yang dikenal pasti menunjukkan peningkatan kes seperti isu tekanan emosi dalam kalangan masyarakat dan seterusnya membawa kepada isu kemurungan dan depresi. Impak krisis kesihatan juga membabitkan institusi keluarga. Kes perceraian dan keganasan rumah tangga telah dilaporkan meningkat sepanjang tempoh Perintah Kawalan Pergerakan (PKP) berkuatkuasa. Manakala, penyebaran maklumat atau berita palsu melalui penggunaan

## SOALAN NO : 38

media sosial juga merupakan perkara yang diberi perhatian serius oleh pihak Kerajaan.

4. Kerajaan mengambil serius kesan pandemik COVID-19 kepada sosioekonomi Keluarga Malaysia. Dalam hubungan ini, Kerajaan telah melaksanakan strategi Pemulihan Ekonomi Negara 6R dengan tumpuan untuk melindungi kehidupan rakyat, kelangsungan perniagaan dan menjana ekonomi. Sebagai langkah jangka pendek, sebanyak lapan pakej rangsangan ekonomi dengan jumlah sebanyak RM530 bilion telah diumumkan oleh Kerajaan bagi membantu rakyat meneruskan kelangsungan hidup dalam tempoh mencabar ini dan telah memberi manfaat kepada kumpulan sasar.

5. Melalui Bajet 2021, Kerajaan meneruskan agenda meningkatkan kesejahteraan rakyat dengan pemberian bantuan kepada rakyat khususnya golongan yang mudah terjejas termasuk kumpulan B40. Antara bantuan yang diberikan termasuk Bantuan PRIHATIN Rakyat (BPR) dahulunya dikenali sebagai BSH dengan bantuan kewangan sehingga RM1,800 dan Perlindungan MySalam dan Program Pengangkutan Awam di bawah My30. Untuk tujuan ini, Kerajaan telah memperuntukkan sebanyak RM17.1 bilion yang memanfaatkan 10 juta penerima daripada golongan B40 dan M40 bagi tahun 2021.

6. Bagi strategi jangka sederhana dan panjang, Kerajaan dalam Rancangan Malaysia Kedua Belas (RMKe-12), 2021-2025 akan meneruskan dasar dan strategi untuk meningkatkan pendapatan dan kuasa beli serta kesejahteraan terutamanya isi rumah miskin dalam kalangan B40 dan M40 termasuklah menyediakan program peningkatan pendapatan serta peningkatan keupayaan; menambah baik akses kepada keperluan asas termasuk pendidikan, kesihatan dan perumahan; menggalakkan keusahawanan dan pelaburan kepada portfolio penjanaan pendapatan serta akses kepada pembiayaan kewangan; dan meningkatkan sistem perlindungan sosial.

7. Usaha mengurangkan ketidaksamarataan pendapatan antara isi rumah adalah penting dalam mencapai pengagihan yang saksama. Inisiatif ini termasuk menangani peningkatan kos sara hidup dan

## SOALAN NO : 38

meningkatkan kuasa beli serta mengukuhkan perlindungan sosial. Bagi menangani peningkatan kos sara hidup dan meningkatkan kuasa beli, penguatkuasaan kawalan harga barang dan perkhidmatan akan dipertingkat untuk menangani manipulasi harga. Inisiatif foodbank dan program tanggungjawab sosial korporat (CSR) akan membantu mengurangkan beban kewangan isi rumah miskin. Literasi dan pendidikan kewangan akan digalakkan pada semua peringkat umur.

8. Bagi menangani masalah sosial, Kerajaan berpandangan kerjasama strategik dan penglibatan semua kementerian dan agensi adalah penting bagi mengekang dan menangani isu-isu sosial dalam masyarakat. Perkara ini tidak hanya terhad kepada peranan Jabatan Kebajikan Masyarakat, Kementerian Kesihatan Malaysia dan Suruhanjaya Komunikasi Multimedia Malaysia sahaja.

9. Kerajaan melalui Kementerian Pembangunan Wanita, Keluarga dan Masyarakat telah menubuhkan Majlis Sosial Negara (MSN) pada tahun 2013 yang menjadi platform utama bagi agensi Kerajaan, ahli akademik dan pertubuhan bukan Kerajaan (NGO) untuk membincangkan isu-isu sosial dan menjadi badan tertinggi dalam Kerajaan untuk mencari jalan penyelesaian bagi isu-isu tersebut. MSN ditubuhkan sebagai jentera pelaksana Dasar Sosial Negara yang merupakan dasar payung merangkumi falsafah dan pelbagai dasar pembangunan sosial negara.

10. Kerajaan percaya bahawa dasar dan strategi di atas dapat meningkatkan pendapatan dan membantu meringankan cabaran semasa dan masa hadapan termasuk impak pandemik COVID-19. Kerajaan optimis momentum pemulihan akan terus memberi impak positif kepada Keluarga Malaysia yang terkesan akibat pandemik COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NOOR AMIN BIN AHMAD [ KANGAR]**

**TARIKH : 28 OKTOBER 2021 (KHAMIS)**

**SOALAN**

**TUAN NOOR AMIN BIN AHMAD [KANGAR]** minta **PERDANA MENTERI** menyatakan bagaimana sistem kawal selia pemerolehan syarikat berkaitan Kerajaan (GLC dan GLIC) terhindar daripada kemungkinan rasuah terutama dengan pelantikan sejumlah ahli politik untuk menjadi pengerusi dan ahli lembaga pengarahnya.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Pelan Antirasuah Nasional (NACP) 2019-2023 telah menggariskan strategi untuk memupuk tadbir urus baik dalam entiti korporat yang merangkumi syarikat berkepentingan Kerajaan sama ada Badan Berkanun, Syarikat Berkepentingan Kerajaan dan Syarikat Terhad Dengan Jaminan (CLBG) yang ditubuhkan oleh Kerajaan.

Langkah-langkah yang turut diambil untuk menghindari daripada kemungkinan rasuah terutama dengan pelantikan sejumlah ahli politik untuk menjadi pengerusi dan ahli lembaga pengarahnya adalah seperti berikut:

- i. Penguatkuasaan Seksyen 17A Akta SPRM 2009 (Akta 694) yang berkuatkuasa pada 1 Jun 2020 yang menetapkan prinsip liabiliti korporat terhadap organisasi komersial;
- ii. SPRM kini sedang melihat keperluan pindaan rang undang-undang berkaitan *misconduct in public office*, menyalahguna jawatan dan kedudukan untuk menerima rasuah, (mengambil kira takrifan badan awam dalam Seksyen 3 Akta SPRM 2009 yang juga merangkumi entiti yang Kerajaan mempunyai kepentingan yang mana, dalam konteks ini GLC sebagai badan awam);
- iii. Bagi memastikan ketelusan, SPRM kini sedang dalam proses meneliti keperluan untuk memasukkan peruntukan baru berkaitan pengisytiharan pemunya benefisial (*benefisial ownership*) kepada pihak yang memperolehi tender/ projek kerajaan (bagi menangani isu kartel, monopoli dan Alibaba; dan
- iv. Kerajaan telah mengeluarkan Arahan Perdana Menteri mengenai Penubuhan Unit Integriti dan Governans (IGU) Syarikat Berkaitan Kerajaan (GIC), Syarikat-Syarikat Yang Dimiliki Oleh Kementerian dan Agensi Kerajaan Termasuk Di Bawah Kerajaan Negeri. Unit ini telah ditetapkan fungsinya kepada 4 teras iaitu pengurusan aduan, pengesanan dan pengesahan, pengukuhan integriti dan governans di GLC/ entiti berkepentingan Kerajaan.

Pelaksanaan inisiatif-inisiatif ini diharapkan dapat meningkatkan lagi keyakinan awam dan para pelabur berhubung pengamalan tadbir urus baik dalam kalangan GLC di negara ini.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NGA KOR MING (TELUK INTAN)**

**TARIKH : 28 OKTOBER 2021 (KHAMIS)**

**SOALAN**

**TUAN NGA KOR MING [ TELUK INTAN ]** minta **PERDANA MENTERI** menyatakan apakah langkah-langkah yang sedang dilakukan serta pencapaian yang dicapai dalam usaha untuk melaksanakan transformasi Parlimen.

**JAWAPAN**

**YB DATO SRI DR. HAJI WAN JUNAIDI BIN TUANKU JAAFAR,  
MENTERI DI JABATAN PERDANA MENTERI  
(PARLIMEN DAN UNDANG-UNDANG)**

Tuan Yang di-Pertua,

Seperti mana Ahli Yang Berhormat sedia maklum, antara inti pati Memorandum Persefahaman Transformasi dan Kestabilan Politik (MoU) yang telah ditandatangani dengan pihak Pakatan Harapan pada 13 September yang lalu adalah untuk melaksanakan transformasi Parlimen. Antara usaha-usaha yang sedang dilaksanakan seperti berikut:

- 1. Meminda dan memperkasakan Akta Majlis Parlimen (Keistimewaan dan Kuasa) 1952:**
  - a. Kajian bagi memperkasa Akta Majlis Parlimen (Keistimewaan dan Kuasa) 1952 telah pun dimulakan dan ia pernah dipinda

pada tahun 1988. Walau bagaimanapun bagi memenuhi kehendak semasa dan memastikan Parlimen ini dapat berdiri dengan sendirinya, mempunyai dan menjalankan kuasanya sendiri, serta mengawal selia kewangannya sendiri dapat dilaksanakan.

- b. Akta ini turut ditambah baik dengan memasukkan klausanya ke dalam Peraturan-peraturan Majlis Mesyuarat sedia ada.
- c. Pengenalan Kod Etika Ahli Parlimen juga masih dalam timbangan untuk dikuatkuasakan dibawah Akta ini dengan memberi kuasa kepada Majlis untuk mengenakan tindakan ke atas mana-mana Ahli yang melanggarnya. Pengenalan Kod Etika Ahli Parlimen juga memerlukan masa yang munasabah sebelum dikuatkuasakan serta memerlukan sesi libat urus bersama pihak-pihak berkaitan demi memastikan ia dapat dilaksanakan dengan sebaiknya serta memberi manfaat kepada semua pihak.
- d. Pandangan untuk memastikan Ahli Parlimen (Ahli Dewan Negara dan Ahli Dewan Rakyat) yang sedang dalam proses pendakwaan di mahkamah direhatkan dari menghadiri mana-mana sesi persidangan Dewan sehinggalah mereka terbukti tidak bersalah juga sedang dalam pertimbangan dan kajian pihak kerajaan dan pastinya sesi libat urus hendaklah diadakan bersama pihak-pihak yang terlibat seperti Ahli Parlimen melalui Jawatankuasa-jawatankuasa Pilihan Khas yang dibentuk Parlimen dan pihak Peguam Negara serta para akademik serta pakar undang-undang dirujuk bagi mendapatkan formasi terbaik bagi memantapkan Akta Majlis Parlimen (Keistimewaan dan Kuasa) yang amat penting kepada semua Ahli Parlimen.

**2. Mengembalikan Akta Perkhidmatan Parlimen 1963 yang dimansuhkan pada tahun 1992**

- a. Kerajaan sedang dalam kajian bagi draf Rang Undang-undang yang baharu untuk mewujudkan Akta Perkhidmatan

Parlimen. Pasti nya Akta yang baharu ini mengambil kira banyak faktor yang memberi manfaat secara menyeluruh kepada pegawai perkhidmatan Parlimen serta pegawai-pegawai gunasama yang pada masa ini masih dalam peringkat perbincangan.

- b. Cadangan penambahbaikan khusus menyentuh antaranya tangga gaji, potensi kemajuan kerjaya serta kemudahan-kemudahan lain serta saraan pegawai Parlimen dan pemerkasaan Jawatankuasa Penasihat yang berperanan mengawal selia pengurusan dan pentadbiran Parlimen akan dikaji dengan teliti agar mereka mendapat faedah yang tidak kurang baiknya daripada yang sedang diterima mereka sekarang.
- c. Pelaksanaan atau garis masa Rang Undang-undang ini djangka memakan lebih masa kerana ia turut melibatkan beberapa Pindaan lain terhadap undang-undang sedia ada termasuklah Pindaan kepada Perlembagaan Persekutuan. Merujuk kepada MoU yang telah ditandatangani, Kerajaan berhasrat untuk merealisasikan perkara ini tidak lewat daripada Mesyuarat Kedua Penggal Kelima, Parlimen Keempat Belas.

**3. Pembentukan Jawatankuasa-jawatankuasa Pilihan Khas – termasuk memperkenalkan Kod Etika Ahli Parlimen**

- a. Majlis Dewan Negara telah pun meluluskan Penyata Jawatankuasa Dewan, Dewan Negara pada 25 Oktober 2021 bagi membentuk 3 Jawatankuasa Pilihan Khas Dewan Negara iaitu Jawatankuasa Pilihan Khas Kesejahteraan Rakyat, Jawatankuasa Pilihan Khas Sosiobudaya, Komunikasi dan Pendidikan serta Jawatankuasa Pilihan Khas Tadbir Urus, Integriti dan Anti-Rasuah.
- b. Jawatankuasa-jawatankuasa Pilihan Khas ini berkuasa untuk memanggil orang dihadapannya seperti mana yang termaktub di dalam Peraturan Mesyuarat 74, Peraturan-peraturan Majlis Mesyuarat Dewan Negara.

- c. Maka, dengan wujudnya Jawatankuasa-jawatankuasa Pilihan Khas ini akan menjadi titik tolak kepada pemerkasaan sistem Jawatankuasa Pilihan Khas di Dewan Negara.
- d. Kerajaan mengalu-alukan kerjasama erat bersama Jawatankuasa Pilihan Khas yang dibentuk agar proses legislatif Negara ini dapat direalisasikan dengan mendasari prinsip pengasingan kuasa ke arah menjadikan Parlimen Malaysia bertaraf dunia.

**4. Membuat Pindaan ke atas Perlembagaan Persekutuan Perkara 45 (4) (a) dan (b)**

- a. Perkara ini dalam timbangan dan kajian Kerajaan khususnya dalam usaha memperkasakan Akta Majlis Parlimen (Keistimewaan dan Kuasa ) 1952 dan mewujudkan Akta Perkhidmatan Parlimen yang baharu akan melibatkan klausa ini di dalam Pindaan terhadap Perlembagaan Persekutuan. Kerajaan ambil maklum dan sedar akan peruntukan ini.

**5. Inisiatif meningkatkan perwakilan wanita dalam Dewan Parlimen.**

- a. Pada masa ini sebanyak 14.8 peratus keanggotaan Dewan terdiri daripada kalangan wanita. Kerajaan mengambil maklum akan cadangan ini dan akan memastikan pemilihan Ahli Dewan Negara dibuat penelitian sewajarnya.

**6. Cadangan mewujudkan Akta Anti-Lompat Parti**

- a. Cadangan untuk mewujudkan suatu peruntukan undang-undang berkaitan anti lompat parti merupakan salah satu agenda transformasi kerajaan bertujuan memastikan reformasi dan pembaharuan dalam sistem pentadbiran Kerajaan khususnya peranan institusi Parlimen dapat terus diperkasakan. Dalam hal ini, kerajaan amat komited untuk memastikan undang-undang berkaitan anti-lompat parti yang akan digubal dapat melindungi hak rakyat Negara ini yang

telah memberi undi serta kepercayaan tinggi kepada Ahli Politik ketika proses pilihan raya.

- b. Selaras dengan perkara ini dan mengambil kira kewajaran pembentangan dapat dilaksanakan secepat mungkin, Kerajaan akan memastikan sesi libat urus yang holistik dan menyeluruh diadakan bersama pemegang taruh, pihak berkepentingan, badan bukan kerajaan, ahli Parlimen, serta rakyat agar RUU baharu dapat diperkenal dan mendapat sokongan semua pihak.
- c. Sesi libat urus ini juga akan memastikan parameter atau hala tuju gubalan undang-undang ini dapat ditetapkan serta tidak bertentangan dengan Perlembagaan Persekutuan atau undang-undang lain yang sedang berkuat kuasa termasuk di peringkat negeri.
- d. Pasa masa ini, kerajaan sedang mengkaji undang-undang yang digunakan di peringkat negeri termasuk kes Mahkamah yang berlaku di beberapa negeri melibatkan pelaksanaan perundangan berkaitan lompat parti. Kerajaan turut meneliti model perundangan beberapa buah Negara seperti India, Singapura dan New Zealand serta United Kingdom yang melibatkan peruntukan lompat parti. Dapatan daripada kajian ini akan dibincangkan melalui sesi libat urus bi-partisan.
- e. Kerajaan akan terus komited dalam memastikan Keluarga Malaysia yang digagaskan dapat mengambil kira semua kepentingan rakyat dan Negara.

Sekian, terima kasih.

**PEMBERITAHUAN PERTANYAAN LISAN DEWAN  
RAKYAT MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN KASTHURIRAANI A/P PATTO  
[ BATU KAWAN ]**

**TARIKH : 28 OKTOBER 2021 (KHAMIS)**

**SOALAN :**

Minta **PERDANA MENTERI** menyatakan apakah pelan jangka pendek dan jangka panjang agar warga bukan Islam di negara Malaysia tidak terus difitnah dan diaibkan oleh orang-orang yang tidak bertanggungjawab seperti Syakir Nasoha yang jelas menggugat keamanan di negara.

**JAWAPAN**

**YB SENATOR TUAN HAJI IDRIS BIN HAJI AHMAD,  
MENTERI DI JABATAN PERDANA MENTERI  
(HAL EHWAL AGAMA)**

Tuan Yang di-Pertua,

1. Isu yang dibangkitkan berkait rapat dengan isu perpaduan. Perpaduan merupakan tanggungjawab yang merentas kementerian. Antara kementerian yang terlibat secara langsung dalam memelihara perpaduan di kalangan masyarakat berbilang bangsa dan agama di Malaysia ialah Kementerian Perpaduan Negara (KPN), Kementerian Pendidikan Malaysia (KPM), Kementerian Dalam Negeri (KDN), Kementerian Komunikasi dan Multimedia (KMM) dan Jabatan Perdana Menteri (Hal Ehwal Agama).
2. Pelan jangka pendek untuk memastikan mana-mana pihak, tidak kira bangsa dan agama difitnah dan diabkan ialah dengan menguatkuasakan peruntukan undang-undang yang sedia ada. Contohnya, seksyen 298 Kanun Keseksaan memperuntukkan kesalahan ‘menyebut perkataan-perkataan dengan sengaja hendak melukakan perasaan agama seseorang.’ Sesiapa yang sabit kesalaha di bawah seksyen ini boleh dikenakan hukuman penjara setahun atau dengan denda atau kedua-duanya sekali.
3. Pada 15 Februari 2021, Perdana Menteri pada ketika itu, Tan Sri Muhyiddin Yassin, telah melancarkan Dasar Perpaduan dan Rangka Tindakan Perpaduan Negara 2021-2030. Rangka Tindakan Perpaduan Negara 2030 dihasilkan bagi menyokong strategi-strategi dalam Dasar Perpaduan Negara serta menetapkan aspirasi perpaduan yang ingin dicapai dalam tempoh 10 tahun akan datang. Penggubalan Dasar Perpaduan Negara adalah berlandaskan kepada Perlembagaan Persekutuan dan Rukun Negara.
4. Di samping itu, aspek pendidikan dan kempen turut digembleng supaya rakyat Malaysia sentiasa mengamalkan sikap toleransi dan saling menghormati selari dengan semangat Keluarga Malaysia.  
Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN LIM LIP ENG [ KEPONG ]**

**TARIKH : 28 OKTOBER 2021 (KHAMIS)**

**SOALAN**

Minta **PERDANA MENTERI** menyatakan kos tambahan dalam menaik taraf aplikasi MySejahtera menjadi “*Super App*” dan pihak mana yang memiliki hak data peribadi dalam MySejahtera.

**JAWAPAN**

**DIJAWAB OLEH YB DATUK DR. ABD LATIFF BIN AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Untuk makluman semua, aplikasi MySejahtera bermula sebagai *Corporate Social Responsibility* (CSR) dan telah tamat tempoh CSR yang diberikan selama satu (1) tahun iaitu pada 31 Mac 2021. Sehingga kini, tiada bayaran yang dibuat oleh Kerajaan Malaysia kepada syarikat pembangun sistem dan aplikasi tersebut.
2. Sejak awal pembangunan, aplikasi MySejahtera ini terus ditambahbaik secara berterusan dan pantas. Melihat kepada kepentingan MySejahtera sebagai aplikasi nasional dalam pengurusan pandemik COVID-19 kini, aplikasi ini boleh dipertimbangkan untuk dipertingkatkan menjadi “*Super App*” bagi aspek penjagaan kesihatan (*healthcare*)



selaras dengan objektif pembangunannya yang menumpukan dalam sektor kesihatan.

3. Pembangunan MySejahtera dilaksanakan selaras dengan Akta Pencegahan dan Pengawalan Penyakit Berjangkit 1988 [Akta 342]. Sehubungan itu, data yang dikumpulkan adalah hak milik Kementerian Kesihatan Malaysia (KKM). Sejak awal pembangunan MySejahtera, pentadbir, pengurus dan pemilik data MySejahtera adalah KKM. Agensi-agensi lain seperti Majlis Keselamatan Negara (MKN) dan Unit Pemodenan Tadbiran Dan Perancangan Pengurusan Malaysia (MAMPU, JPM) bertindak sebagai penyokong kepada KKM bagi pihak Kerajaan Malaysia. Data yang dikumpul dalam aplikasi MySejahtera akan terus kekal menjadi hak milik KKM selaras dengan peruntukan di bawah Akta 342.

4. Dalam hal berkaitan jumlah pembayaran termasuk kos-kos lain dalam MySejahtera, pihak Kerajaan yang diterajui oleh MAMPU dan dianggotai oleh KKM, Kementerian Komunikasi dan Multimedia Malaysia (KKMM), Unit Kerjasama Awam Swasta, Jabatan Perdana Menteri (UKAS, JPM), dan National Cyber Security Agency (NACSA, MKN) masih dalam perbincangan untuk bagi memutuskan perkara ini.

5. Perolehan berkaitan MySejahtera ini akan dipastikan supaya memenuhi syarat-syarat dibawah kontrak perolehan Kerajaan yang lain dan pihak kontraktor perlu mematuhi *Service Level Agreement* (SLA) yang ditetapkan dalam memastikan ketersediaan perkhidmatannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN BARU BIAN [ SELANGAU ]**

**TARIKH : 28 OKTOBER 2021 (KHAMIS)**

**SOALAN**

Minta **PERDANA MENTERI** menyatakan berapa banyak wang yang telah dibelanjakan untuk mengubah perkhidmatan digital Kerajaan dan berapa banyak adalah syarikat teknologi milik Malaysia.

**JAWAPAN:**

**DIJAWAB OLEH YB DATUK DR ABD LATIFF AHMAD  
MENTERI DI JABATAN PERDANA MENTERI  
(TUGAS-TUGAS KHAS)**

Tuan Yang di-Pertua,

1. Kerajaan sentiasa komited dalam melaksanakan transformasi penyampaian perkhidmatan Kerajaan kepada perkhidmatan Digital. Inisiatif yang dilaksanakan bertujuan meningkatkan produktiviti dan daya saing negara serta kecekapan dan keberkesanan jentera pentadbiran negara dengan memanfaatkan teknologi maklumat dan komunikasi (ICT) secara intensif serta komprehensif.
2. Unit Pemodenan Tadbiran Dan Perancangan Pengurusan Malaysia (MAMPU), Jabatan Perdana Menteri memainkan peranan dalam memperkasakan sistem penyampaian perkhidmatan awam melalui pendigitalan ke arah perkhidmatan yang lebih cekap dan berkesan.
3. MAMPU telah menyediakan perkhidmatan guna sama merentas agensi Kerajaan melalui 23 projek ICT melibatkan peruntukan Pembangunan Rancangan Malaysia Ke-11 sebanyak RM1.452 bilion dan kesemua syarikat yang terlibat adalah syarikat milik Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : PUAN YEO BEE YIN [BAKRI]**

**TARIKH : 28 OKTOBER 2021 (KHAMIS)**

**SOALAN**

**PUAN YEO BEE YIN [ BAKRI ]** minta **MENTERI ALAM SEKITAR DAN AIR untuk** menyatakan jumlah penguatkuasaan yang telah dibuat oleh Jabatan Alam Sekitar dari 1 Januari 2021 sehingga kini. Apakah langkah-langkah yang diambil oleh kementerian untuk memperkasa jentera penguatkuasaan JAS.

**JAWAPAN**

Tuan Yang Di-Pertua,

1. Kementerian Alam Sekitar dan Air (KASA) melalui Jabatan Alam Sekitar (JAS) adalah komited untuk melaksanakan penguatkuasaan kepada punca-punca pencemaran berdasarkan Akta Kualiti Alam Sekeliling 1974 (AKAS 1974) dan Peraturan-peraturan di bawahnya bagi memastikan pematuhan berterusan oleh sektor-sektor yang berkaitan.

2. Bagi tempoh 1 Januari 2021 sehingga 15 Oktober 2021, JAS telah menjalankan 17,033 pemeriksaan ke atas premis-premis yang tertakluk kepada AKAS 1974 di seluruh negara. Hasil daripada penguatkuasaan tersebut, sebanyak 6,736 tindakan tegas di bawah AKAS 1974 yang merangkumi 1,421 Notis Arahan, 4,918 kompaun, 134 Penahanan Operasi Kelengkapan, 2 Perintah Larangan, 13 Gantung Lesen dan sebanyak 248 Kertas Siasatan telah dibuka.

3. Sebagai perbandingan, bagi tempoh sama pada tahun 2020, 17,049 pemeriksaan telah dijalankan dan 8,498 tindakan telah dikenakan (2,254 Notis Arahan, 6,034 Kompaun, 94 Penahanan Operasi Kelengkapan, 18 Perintah Larangan, 22 Gantung Lesen dan 76 Kertas Siasatan).

4. Kementerian juga akan terus mengambil inisiatif untuk memperkasakan jentera penguatkuasaan JAS, antaranya melalui:

- (i) menambahbaik dan mengukuhkan AKAS 1974 secara berfasa termasuk memberi fokus kepada elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar;
- (ii) meningkatkan kerjasama dengan agensi penguatkuasaan lain di peringkat Kerajaan Persekutuan dan Kerajaan Negeri seperti Jabatan Sukarelawan Malaysia (RELA), Kementerian Perumahan dan Kerajaan Tempatan (KPKT), Pihak Berkuasa

## SOALAN NO. : 44

Tempatan (PBT) dan lain-lain agensi melalui pelaksanaan operasi bersepadu, perkongsian maklumat dan pengurusan aduan alam sekitar yang lebih berkesan. Antara inisiatif yang digerakkan Kementerian adalah Unit Cegah Jenayah Alam Sekitar (UCJAS) dengan kerjasama Polis Diraja Malaysia (PDRM);

- (iii) memastikan peruntukan mencukupi disediakan untuk perolehan berkaitan logistik seperti peralatan persampelan, kenderaan dan kelengkapan pelindung diri (*Personel Protective Equipment - PPE*) bagi memastikan aktiviti penguatkuasaan di lapangan dapat berjalan lancar;
- (iv) pembangunan modal insan secara berterusan melalui pelaksanaan program-program latihan teknikal secara norma baharu; dan
- (v) memperkasakan pemantauan dan penguatkuasaan melalui program rondaan secara berkala termasuk di luar waktu pejabat dan penggunaan *drone* di kawasan tumpuan pencemaran. Selain itu, JAS juga mengambil pendekatan *smart enforcement* melalui penguatkuasaan secara *desktop* menggunakan sistem-sistem pelaporan atas talian JAS seperti *Electronic Schedule Waste Information System* (ESWIS), *Online Environmental Reporting* (OER), *Sistem Environmental Mainstreaming Tools* (EMAINS), *Integrated Remote Monitoring System* (iRemote) dan *Continuous Emission Monitoring System* (CEMS).

Sekian, terima kasih.